

KOTIAMA LOKUMU YA MWANA ³



...-ko Neville. Mbote, kelasi. Tozali na esengo mingi ya kozonga awa mpo na kopesa bino lisusu mbote na Nkombo oyo ekoká-na-nyonso, ya Nkolo Yesu. Nazolikia ete bolekiisi mpóso moko ya nkembo, ya masánzoli mpe mapamboli na Ye.

² Kaka nakokótáká na ntongo oyo, nakutanaki na mwana mobali moke moko kuna, mpe apesaki ngai palaki moko ya elíngi ya moke, ya Mwanje mobateli azali kosénzela likoló na bana mibale ya mike. Mpe nayebaki te ete wana ezalaki Daulton, mwana mobali moke ya libota Daulton.

³ Mpe eleki mwa bampóso, to mwa... Eleki pene na mpóso mibale, ezalaki na tata moko, tata Moklisto, asengaki mpo na elenge mwana na ye ya mwasi oyo akómaki naino Moklisto te, wana atelemaki na molongo ya mabondeli. Mpe Molimo Mosanto alobaki: “Na—Napesi yo mwana na yo.” Mpe tala ye oyo na ntongo oyo, abikisami mpe abatisami na Nkombo na Nkolo Yesu, afandi na etumbelo, kaka ndenge Molimo Mosanto alobaki. Mpe bana mosusu nyonso bafandi zingazinga. Nayebi ete libota Daulton ezali na esengo.

⁴ Namoni kuna elenge mwasi oyo babondelaki mpo na bebé na ye mokolo ya Lomingo eleki, bakanisaki ete alingaki kokufa. Namoni azali naino elongo ná biso na ntongo oyo, mpe tozali na esengo mingi mpo na yango, ndeko mwasi. Bakanisaki ete azalaki na dystrophie musculaire, kasi azalaki na yango te. Na boye, tozongisi matondi mingi.

⁵ Namoni baninga na biso nyonso ya malamumu. Nazoyeba lisusu mobali oyo ntango ayaki epai na ngai, na lisolo ya biso mibale, na—na Chatauqua, nakanisi, mokolo moko. Naliaki bilei ya ntongo elongo ná yo ná mwasi mpe bana na yo, nabanzi e... to yo ná mwasi na yo, to bana mpe, iyo. [Ndeko moko alobi: “Middletown.”—Mok.] Middletown, na... Kasi biso nyonso... Nabosani nkombo yango, boye nakobenga yango kaka Chatauqua. Iyo, misie. Banninga na ngai mingi ya malamumu.

⁶ Ndeko mobali Charlie Cox ná Ndeko mwasi Nellie, awa, oyo ndako na bango ezalaka ndako na ngai ya mibale, mpe na ntembe te, bokokaki kozala bana na ngai mpenza. Nakendeke kuna, ezali esika oyo nalekisaka ntango na ngai mingi ya kopema, ezalaka nde kuna. Azali moí-bokila ya malamumu koleka, ya biséndé, na Kentucky, ntango nazalaka na Indiana. Boye, Indiana... Mpe Charlie, nalobi na yo, nazali mpenza na mposa makasi, nazoyoka mposa makasi mpenza, ya kokende kolóba mwa ba-perche ya Amerika to ba-perche arc-en-ciel liboso nákende kuna. Namoni lokola ete nakoki koyíkela yango mpiko mpenza.

⁷ Ndeko Parnell...Par...Arnett, ya Lou...Caroline du Sud. Mpe Ndeko...Ee, bazali mpenza ebele awa, baoyo bauti na bisika ndenge na ndenge, oyo bayei, na ntongo oyo, kotala biso.

⁸ Boyebi, tozalaka na bandimi ya libela-libela te, awa. Tozalaka kaka na boyokani bamoko na bamosusu, wana Makila na Yesu Klisto, Mwana na Nzambe, ezali kopétola biso na mabe nyonso.

⁹ Sikoyo, tozali koyekola likambo moko ya kitoko mingi, ya nkembo mpenza. Mpe tozali, ngai nde mpenza nazali...nayebe ete nazali kosepela na yango, mpe nayebe ete bino nyonso mpe bozali kosepela na yango. Nabandaka mbala mosusu, na mokolo mobimba, kolobela yango to kotánga na ntina na yango, nakozua pene na milongo mibale mpe nabandi kotámbola na kati ya Makomi mpe, na mbala moko, nasíli kotánga longwa na Genese kino na Emoniseli, nazokoba kaka.

¹⁰ Mpe, boyebi, nakosepela kozua ntango moko oyo tokoki—oyo tokoki kozua Buku ya—ya Baebele, mpe kozua kaka ndakisa...Ee, ntango eleko ya bokila ya biséndé ekobanda, ndakisa na sanza ya Libw-...pene na sanza ya Zom-...ya Mwambe, boyebi, mpe koyekola yango kino ntango ya kokende na mikili mosusu ekokoka, kozua kaka mpokwa moko moko, Buku ya Baebele, to Buku ya Esode. Ndenge Nzambe, Esode, abimisaki libota na Ye na Ezipito, esode! Etaliseli kitoko mingi ya biso sikoyo, ndenge tozali komilengela mpo na esode oyo ya biso. Ezali, oh, ezali likambo moko kitoko mpenza. Makomi nyonso ekangani elongo, mpe ekómi Lisolo bobele moko ya monene.

¹¹ Sikoyo, na ntongo oyo, tozali—tozali naino na Buku ya...Tolingaki kozua mikapo misato ya ebandeli ya—ya Buku ya Baefese. Mokanda ya Polo epai ya Baefese, na Efese, azalaki komeka kotia lingomba na esika na yango. Mpe liboso ete tóbanda yango, tokoki kozua lisusu mwa ntango moko to mibale mpo na kobondela, liboso ete tóbanda.

¹² E Nkolo, Nzambe na biso, tozali koya liboso ya Bozali na Yo sikoyo, biso tolongobani ata moke te, kasi toyebi ete ezali na Mbeka moko ya Makila kuna kozeláká, kopetoláká biso na mbindo nyonso, mpe kotalisa biso liboso na Tata, kozanga mpámela, kozanga mbéba. Ná eloko moko te oyo tokokaki ata kosala mpo na kozua litomba oyo. Kasi lokola Yesu asili kosala oyo mpo na biso, tongumbami na komikitisa liboso ya Bozali na Ye mpe Nkombo na Ye, kosenga ete Ótinda Molimo Mosanto awa, na ntongo oyo katikati na biso. Mpe kozanga kozala théologien, to koyeba kotia Makomi na molongo, kasi natondi bobele na esengo makasi mpe na matondi ya koyoka bozali ya Molimo Mosanto, wana Ezali koningana kati na bomoto na ngai, tika ete Épambola biso nyonso elongo wana tozali kotánga Liloba likomámá na Yo, mpo Ékoka kokóma Bomoi ya Seko mpo na

biso. Kokisa yango, Tata. Tosengi yango na Nkombo na Yesu mpe mpo na Yesu. Amen.

¹³ Sikoyo, nakoki koloba awa, liboso, ete soki na ntango moko nakoki koloba likambo moko oyo ekoki kokesene mpenza, oyo elongobani mpenza te, ntango mosusu ekoki kozala mpenza malamau te na malakisi na bino, to likambo moko oyo okoki kondima te, natii elikya na Molimo Mosanto, ete Akokómisa yango kitoko mingi mpe elengi mingi, na lolenge ete ekozala te . . . ékobetisa libaku ata moke te. Bomoni? Na lolenge ete eko—ekosalema na bolingo mpe bondeko, ete wana nde e . . . Elingaki koloba ndenge wana.

¹⁴ Mpe nyonso oyo ebandaki na liteya ya mokolo ya Lomongo eleki, nabanzi ezalaki na ntongo ya Lomongo eleki, *Mokonzi Oyo Aboyami*. Moto moko asili kozua bande yango? Nakanisi bazali na yango, mpe bokoki kozua yango soki bolingi, *Mokonzi Oyo Aboyami*.

¹⁵ Sikoyo, etikali kaka mwa mikolo, mpe tokobanda na . . . kuna na Middletown, na Ohio. Tokosepela ete baoyo nyonso bazali na lóyi na bango—na bango na ntango wana báluka kokutana na biso kuna, mpamba te tozali kozela kolekisa mpenza ntango malamau ya bondeko, na Middletown, na Ohio. Docteur Sullivan moto azali mokonzi, nakanisi, ya likita yango. Mpe likambo yango ekozua mpokwa mitano, ngai nakoteya lokola mo—motei oyo babengisi na Convention Internationale ya église Interdenominationelle. Bongo—bongo nsima na yango, ekozala mayangani na biso moko longwa na oyo wana. Tobongisi yango kino mokolo mwa zomi na mibale, kasi soki toyokani ete tokoki kokóba, ata mpóso moko lisusu nsima na yango, ekotala kaka ndenge oyo Molimo Mosanto akokamba. Bisu nyonso tolingaka kokambama na Molimo; kaka oyo Molimo alobi ósala, na bongo, sálá yango noki-noki.

¹⁶ Mpe tóbosana te ete wana tozali kotósa Molimo, likambo moko ya motuya oyo tolingi koyekola, ezali kokende mbangu—mbangu ata moke te. Bomoni, zuá ntango na yo, zala na kondima. Soki tosengi Nzambe eloko moko, tóbosana te, Nzambe ayanolaka libondeli. Asalaka yango na ntango na Ye, na ndenge ya malamau koleka, Asalaka ete yango étambola mpo na bolamu na biso. Mpe soki ezali bongo te, na bongo tozali kosala nini awa na ntongo oyo? Ntina—ntina nini tozali kolobela Boklisto? Nzambe . . . Soki oyo ezali Liloba na Nzambe te, boye Ezali solo te, na bongo tozali bato ya mawa koleka, kati na bato nyonso.

¹⁷ Nazali na esengo monene ya kosangana na motema mobimba ná bato mingi awa, oyo bayebi ete Oyo ezali Liloba na Nzambe oyo ekweyaka te. Na boye Yango, Yango ezali Solo, Liloba moko na moko, Liloba moko na moko na Yango, eteni moko na moko

na Yango. Mpe na ngolu na Nzambe, nazuaki litómba ya komona Mboka yango, epai oyo tokokende mokolo moko.

¹⁸ Lobi eleki (Bato bayebaka te ba-ngonga ya bwálé na makanisi oyo eyaka ná lotómo ya lolenge oyo.), nanyokwamaki mpenza na makanisi, mpe nalobaki na mwasi na ngai: “Ekokaki kozala malamú soki nakokaki kokende na ngai.”

Alobaki: “Mpo na nini olobi bongo, Bill?”

Nalobaki: “Oh, awa, nazali na mikakatano mpe nyonso wana.”

¹⁹ Bongo, emonanaki lokola Molimo Mosanto alobaki: “Ozali koluka kozunguluka yango? Ozali—ozali koluka kokíma yango?” Bomoni?

²⁰ “Te,” nalobaki, “tika ete nátelema liboso na yango nyonso mpe nátelemela na yango.” Bomoni, kaka . . . Bomoni?

²¹ Ezali malamú mingi koleka. Na bosémbó, na bosolo, nazali koloba yango mpo namoni yango na miso, ete kaka nsima na bomoi oyo kosila, tokótaka na Mboka oyo eleki nyonso oyo moto nyonso akoki kokanisa. Mpe soki bapaya bazali awa, natii motema ete bozali te ko . . . nabondeli na Nzambe ete bómona te ete ngai nazali fanatíki moko boye. Na—nalingi, na nyonso, ete názala sémbó mpe nálóba Solo. Mpe ekosunga ngai na nini koloba likambo oyo ezalaki lokuta, na ntango oyo ezali mpenza—ezali na makambo mingi mpenza awa oyo ezali Solo? Bisó, mpo na nini ekosengela tobuka lokuta na ntina na yango? Bomoni? Yango, Yango ezali mpenza Solo.

²² Mpe, kokamwa te, nakanisi ete Polo moto amemamaki kino na lola ya misato, mpe amonaki makambo oyo epesemelaki na ye te kolobela yango. Mpe mokolo moko alobaki: “Lísó emóná te, litói eyóká te, to ekótá mpe te na motema ya moto, likambo oyo Nzambe abongisi (abómbisi) mpo na baoyo balingaka Ye.”

²³ Oh, tozobika mpenza . . . Tozobika na kati ya fúlu monene awa na nsé, nyonso wana, ngomba moko ya bosoto oyo etóndi na—na mólinga yo solo uta na biloko ya mbindo. Ya . . . Ata soki biso moko topakolami bosoto yango te, tozali kobika kati na yango, esika oyo mólinga ezali kouta na mólinga ya makala ya lisumu. Moko na biloko oyo epesaka ngai mposa makasi ya kosánza soki nakanisi yango, ezali fúlu ya engumba oyo ezali kozika. Bosílá kozala pembeni na moko? Solo mabe makasi, ya bipola, ya mólinga oyo ezali kouta na biloko ndenge na ndenge ya mbindo. Mpe—mpe soki opemi mopepe na yango, ekobalola yo mpenza likundu.

²⁴ Nazoyeba lisusu ntango nasengelaki kokende na New Albany, kuna na . . . na nsé ya Dix-huitième Rue, kuna epai oyo fúlu moko ezaláká, esengelaki na ngai kofutisa bato mbongo mpe kotánga na ba-compteur kuna. Nazalaki kobanga mwa moke mokolo oyo esalemaki na nzela ya dix-huitième, na ntango

oyo nasengelaki kokóma kuna, mpo esengelaki koyoka solo mabe wana. Nzokande, bibembe ya ba-mpúku ná ba-mbwa, mpe nyonso wana, boyebi, oyo ezalaki kobimisa mólinga, mpe mólinga yango ezalaki kobimela na kati na yango.

²⁵ Sikoyo, nzokande, wana nde oyo bomoi oyo, na malamumu na yango ya koleka, ezalaka soki okokanisi na yango. Kobimisa mólinga, lisumu elumbaka solo bisika nyonso, ndenge ezalaki, na elobeli ya molimo. Kasi, oh, epai mopepe ezali kopepa na bonsomi, mpe nyonso ezali kitoko, kimia, esengo mpe Bomoi na Seko, kaka na ngámbo ya ebale. Kasi tozali kati na etumba, boye, tófanda kaka te mpo na koloba: “Tósala nokinoki mpe tókóma kuna,” tómema elongo na biso moto nyonso oyo tokoki komema. Iyo.

²⁶ Mpe sikoyo, ntina ya malakisi oyo, ezali mpo na kofandisa lóngo ngwi ya baoyo basili kokatisa na Mboka yango. Ntina ya likambo oyo, na koyekóláká Buku ya Baefese oyo, ezali mpo na kotia lingomba na esika na yango, epai yango eteleme mpenza kati na Klisto. Ezali etaliseli ya Kondimana na Kala, mpe ya Buku ya Yosua, ndenge Yosua akabolaki mabelé. Mokolo ya Lomingu oyo eleki, toyekolaki yango, ndenge Yosua akabolaki mabelé na moto moko moko. Mpe asalaki yango na mpémela.

²⁷ Ndenge Mose azalaki . . . abimisaki bato na Ezipito, na áyi, na pwaró, abimisaki bango, mpe apesaki bango esika oyo Nzambe asilaki kolaka mibu nkama minei nsima na yango . . . to mibu nkama minei liboso na yango, ete Akomema bango na esika moko, na mboka moko ya kitoko etondi na miliki ná mafuta ya nzói. Mpe Mose akambaki bana ya Yisraele sémba kino na mboka yango, kasi amemaki bango na ngámbo te.

²⁸ Mpe Yesu, epai ya bato ya molimo, epai ya bato oyo bako . . . to lakamaki Molimo Mosanto uta ebandeli, Yesu akambaki biso kino na elaka yango. Kasi Molimo Mosanto ayaki, lokola Yosua, mpo na kokonza mpe kokamba mpe kotambwisa, mpe kozua mboka yango, to kozua lingomba. Tomoni, mpenza, na bongo, ete kati na biso . . .

²⁹ Sikoyo esika oyo nde, ntango mosusu, bato bakoki kokanisa ete nazali maloba makasi mpe nazoluka kotiola bandeko. Ezali bongo te! Nzambe nde Mosambisi na ngai, ezali bongo te. Bomoni? Nazoluka bobele kobenda bokebi na eloko oyo ezali Solo. Bomoni? Tosili kopona bakambi, ya bato, esika ya kokambama, bakambi, bokambami ya Molimo Mosanto. Tolingaki ete bato bákabolela biso biteni na biso mpe bákamba biso, ba-denomination lokola ba-Metodiste, ba-Batiste, ba-Presbiterien, ba-Lutherien, Eglise du Christ, ba-Pantekotiste, ná ba-denomination ndenge na ndenge, kotia ebongiseli moko lokola ndakisa, mpe tolandaka yango. Kasi tozali . . .

³⁰ Esika moko te na Biblia tosengeli kosala likambo ya ndenge wana. Ezali na nkómá moko te ya Makomi, na Biblia mobimba

ya Nzambe, epai wapi Ye atikalá kokómisa lingomba ebongiseli to esika Ye atikalá kolobela ebongiseli moko, esika moko te na Biblia. Kasi ekesanaka ntango nyonso na yango. Ye alingaka te ete biso tózala na lolenge lokola makambo ya mokili. Alingaka ete tókesana, tótíama pembeni.

³¹ Nalingi koloba te, sikoyo, ete tózala “bolole,” ndenge babengaka yango. Nalingi koloba kozala libota oyo ebengami kobima, oh, ekólo ya bulee oyo epambolami, kobikáká bomoi oyo ezangi mpámela, kosala, komitambwisa biso moko kaka ndenge Ye alingaki kosala kati na biso, mpo biso tozali mosala na Ye, tozalisami kati na Klisto Yesu mpo na misala malamumu.

³² Sikoyo, mokolo ya Misato na mpokwa, mingi kati na bino bazalaki awa te mokolo ya Misato na mpokwa, kasi toyekolaki. . .Nabanzi ete ezali molongo ya 3 to. . .Te, ezali molongo ya 5.

. . .mpo na lokumu ya bana, to kotíama ya bato. . .

³³ Ndenge Nzambe alukaka kotia bato na Ye na esika elongobani, mpe soki Nzambe atii moto na esika, okomona, oh, lingomba mobimba elingi kokóma lokola moto wana, kozala na makambo ya ndenge moko, kosala makambo yango moko. Tokátámá na kokesene, tosálémá na kokesene, tosálémá na lolenge ekeseni, mpe totiámá moto na moto na esika ekeseni, moto na moto na mosala ya kokesene; ntango mosusu moko mpo na mosala moko ya moke, mosusu mpo na mosala ya monene. Nakanisi ete ezalaki Dawidi to moko na basakoli, nabosani sikoyo, nde alobaki: “Nakosepela kozala enyatelo ya makolo na Ndako ya Nkolo, na esika ya kozala. . .ya kofanda na bahéma elongo ná bato ya nka- . . .ya nkanza.”

³⁴ Sikoyo tokotelema mwa moke kaka na kotíama lokumu ya mwana, na molongo ya 5, komeka kokende mosika na ndenge oyo tokokoka ná yango. Kasi, sikoyo, bóbosana motó ya liteya te, na mobimba, tozali koyekola kotíama. Bato boni bazali kososola yango? Tika tóyoka bino koloba yango elongo: “Kotia Nzoto ya Yesu Klisto na esika na yango kati na Klisto epai Molimo Mosanto azali kokamba biso.” Yango mpenza, sikoyo tosimbi yango, bomoni. Kotia biso na bisika elongobani, Buku ya Baefese esengeli kosala yango.

³⁵ Mpe bótala malamumu molakisi monene oyo, Polo. Likambo ya liboso oyo asali ezali kolongola likanisi nyonso ya kokweya. Kolongola likanisi nyonso ya koloba ete “nazali Moklisto lelo, kasi lobi nasuki na ngai, mpe mokolo oyo elandi Nzambe akweisi ngai, mpe mokolo oyo elandi nazongi lisusu.” Oyo wana ezali bolémá! Sikoyo oyo ezali. . .Buku oyo ezali malakisi ya kopalanganisa Nsango-malamumu te, ezali mateya ya bapalanganisi Nsango-malamumu te. Tozali te ko. . .Nalobelaka yango te na bilanga ya koteya. Nateyaka yango na losambo, mpamba te Polo ateyaki yango epai na basantu, baoyo

babengami mpe babatelami, batondisami mpe batiami pembeni, mpe bazali kati na Molimo Mosanto, basili kokóta na Mboka ya Kanana. Azali koluka koyebisa bango ete, likambo ya liboso, bólongola na makanisi na bino ete bokobunga mpe bokosala likambo *boye*, mpe bobangaka eloko *boye*. Bóbánga eloko moko te, mpo azali koluka koyebisa bino esika oyo bozali, banani bino bozali, lolenge nini botelemi.

³⁶ Sikoyo, ekoki kosalema ete ósala makambo ya mabe, mpe mbala nyonso okosala likambo ya mabe, okofúta mpo na yango. Iyo misie, okobuka oyo oloni! Kasi yango etali lobiko na yo na likambo moko te. Soki obotami na Molimo ya Nzambe, ozali na Bomoí ya Seko, mpe okoki lisusu kokufa te, kaka ndenge Nzambe akoki kokufa te. Ozali eteni ya Nzambe, ozali mwana na Nzambe.

³⁷ Nabótámá Branham. Ekoki kosalema ete bopesi ngai nkombo mosusu. Nkombo mosusu ekosala ngai ata eloko moko te, nazali kaka Branham. Nabótámá Branham, nakozala ntango nyonso Branham. Nako. . . Ekoki kosalema ete elongi na ngai ébeba mokolo moko, ébebisama na arthritis, názua likámá ya motuka mpe nábeba na mobimba na lolenge ete nakóma lokola nyama, kasi nakozala kaka Branham! Mpo na nini? Makila ya Branham ezali kati na ngai.

³⁸ Yango nde oyo yo ozali. Mpe, lokola Nzambe akómisi yo. . . Sikoyo, bóbosana te, nazali koloba te na baoyo bazali libanda na Klisto. Nazali koloba na baoyo bazali kati na Klisto. Ndenge nini bokótaka kati na Klisto? “Na nzela na Molimo moko!” Ya monene M-o-l-i-m-. . . elingi koloba: “Na nzela na Molimo Mosanto moko, biso nyonso tobatisami kati na Nzoto moko.” Ndenge nini to. . . Ndenge nini tokótaka kuna? Na nzela na libatisi ya máí? Lolenge wana nde nakesanaka ná bino ba-Batiste, mpe bino Eglise du Christ. Na nzela na libatisi ya mai te, ata moke te! Bakorinti ya Liboso 12 elobi: “Na nzela na Molimo moko, Molimo Mosanto, nde tokotisami na kati na Nzoto yango.” Mpe tobatelami mpenza, ndenge Nzoto yango ebatelami. Nzambe azali. . . alakaki yango.

³⁹ Ndenge nini Nzambe akokaki kosambisa Ye lisusu, ntango Akendeki na Kalvári? Amataki na Gologota, Abetamaki, Azokisamaki, Akokaki kobikisa na nzoto te, Akokaki ata koloba liloba moko te, na mpasi mpenza. Mpo na nini? Amemaki masumu ya mokili likoló na Ye. Ezali te mpo Azalaki mosumuki, kasi “Akómisamaki lisumu” mpo na ngai mpe mpo na yo. Masumu nyonso ya mokili, kobanda Adama kino na Boyei na Ye, efandi na lipeka na Ye. Mpe Nzambe azalaki kopesa etúmbu na Mwana na Ye te. Azalaki kopesa etúmbu na lisumu. Bomoni ndenge likambo yango ezalaki nsómo? Azalaki kolongola lisumu. Azalaki kofungola nzela ya kokímela, mpo na baoyo nyonso Nzambe, na makoki na Ye ya boyebi makambo liboso, ayebacki ete bakoya. Tokokóta na likambo yango na miniti moke.

40 Sikoyo, na bongo, ntango okómi “na nzela na Molimo moko, tobatisami kati na Nzoto yango, Nzoto moko, elingi koloba Klisto,” mpe tobatelami mpo na libela.

41 Sikoyo, wana nde esika oyo emonanaka ndenge mpenza, koleka mingi epai ya ba—ba—bandimi ya ba—Arminien, ete bango bazali. . . basengeli kosala likambo moko mpo bázua litómbá bango moko, to mbano moko boye ya eloko moko. Ndenge nini ekoki kozala na nzela ya makambo mibale na mbala moko? Tó ezali na nzela ya ngolu, tó na nzela ya misala, moko kaka. Ekoki kozala na nzela ya eloko moko te, ezali na nzela biloko mibale ekeseni; esengeli kosalema na nzela ya eloko moko. Ezali. . .

42 Ngai, oh, nakoki komona eloko mosusu te, bobele ngolu na Nzambe. Ngai nasalémá bongo. Nandimaka ntango nyonso ngolu. Mpo na ngai, ezali kaka ngolu na nyonso, esili. Ezali te ete na—na. . . ata na bomoi na ngai, ntango nazalaki mwana moke, nazalaki komona eloko mosusu te, kaka ngolu, ngolu. Balobaka: “Na—nako. . . Soki okwanzi ngai mokongo, ngai mpe nakokwanza oyo ya yo.” Ee, ezali elobeli moko ya nsómo. Kasi etali ngai te, ókwanza ngai to te, soki oyo ya yo esengeli kokwanzama, nakokwanza yo, ata bongo. Bomoni, ngolu. Iyo, misie. Bomoni, ngolu esalaka na nzela na bolingo. Soki osengeli na yango! Etali te soki osálá naino eloko moko te mpo na ngai, na—nazali na ngai na likambo moko te ná yo, soki yo osengeli na yango, ngai nakosala yango ata bongo. Ngolu! Mpamba te osengeli na yango!

43 Nazalaki na bosenga ya kobikisama. Eloko moko te ekokaki kobikisa ngai. Ezalaki na eloko moko te oyo nakokaki kosala mpo na ngai moko, nakokaki komibikisa te, koleka eloko moko te. Kasi nazalaki na bosenga ya kobikisama, mpo nazalaki kondimela Nzambe moko. Mpe Nzambe atindaki Mwana na Ye, na nzoto lokola oyo ya lisumu, mpo na koniókwama na esika na ngai, mpe nabikisamaki, na ngolu kaka nde ngai nabikisamaki. Nakokaki kosala ata eloko moko te, to yo pe, mpo na komibikisa. Mpe baoyo Ayebaki liboso, liboso na kozalisama ya mokili. . .

44 Tolobelaki yango, mokolo ya Misato eleki. Totalisaki Nzambe kati na Elah, Elohim na Ye, mpe totalisaki ete Ye azalaki kobika-na-ye-moko. Kasi na kati na Ye Botata ezalaki, na kati na Ye, makoki ndenge na ndenge ezalaki, ndakisa, Mobikisi ya milimo, ndakisa, Mobikisi ya bokono. Nyonso wana ezalaki kati na Nzambe, mpe Nzambe azalaki kobika-na-ye-moko. Kasi lokola Azalaki Mobikisi ya milimo, Azalaki Tat-. . . Azalaki na Mwanje moko te, Azalaki na eloko moko te. Eloko moko ezalaki te, bobele Ye moko. Azalaki kobika-na-Ye-moko. Eloko mosusu ezalaki te, kaka Nzambe.

45 Kasi lokola Azalaki Nzambe, na boye eloko moko esengelaki kozala mpo na kokumbamela Ye, mpo Azalaki kolinga

kokumbamelama. Mpe Ezali na Ye Moko ekelaki bikelamo mpo na kokumbamela Ye. Sikoyo, na ngonga mokuse, tózongela yango lisusu, na ngonga mokuse sikoyo, tokozongela yango na mobimba te, kasi bokozua yango na bande. Kasi, na bongo, lokola Azalaki Nzambe, Asalaki Banje, mpe Banje bakumbamelaki Ye. Banje bakumbamelaka Ye kino lelo. Ee, Banje oyo bazalaka Liboso na Nzambe bazali na mapapu motoba, mibale-mibale, mapapu motoba. Bazipaka mibale, na elongi na Bango, mibale na makolo na Bango, mpe mibale mpo na kopumbwa, Liboso na Ye, kogángáká butu-mói: “Santu, santu, santu, Nkolo Nzambe na Nguya-nyonso.” Yango nde oyo Makomi elobi. Bakumbamelaki Ye, sikoyo, yango ekelaki eloko moko mpo ékumbamelaka Ye.

⁴⁶ Lisusu, kati na Ye, mosala ya Mobikisi ezalaki. Ndenge nini moko na Bikelamo wana, na ntango lisumu ata moko ezalaki te, to makanisi ya lisumu ata moko te, ndenge nini moko na Bango akokaki kobunga? Ekokaki kosalema te. Boye, eloko moko esengelaki kosalema, oyo ekokaki kobunga, mpo Ákoka kozala Mobikisi. Kati na Ye azalaki Mobikisi ya bokono. Bondimi ete Azali Mobikisi? Bondimi ete Azali Mobikisi ya bokono? Kasi, bongo soki eloko ya kobikisa na molimo to na nzoto ezalaki te? Bomoni, eloko moko esengelaki kokelama ndenge wana.

⁴⁷ Bongo sikoyo, Atikálá kokela yango ndenge wana te, kasi Apesaki moto bonsomi ya kopona: “Soki oponi *oyo*, okozala na bomoi, soki oponi *wana*, okokufa.” Mpe moto nyonso oyo ayaka na mokili atiamaka liboso ya likambo yango moko. Nzambe, na boyebi na Ye makambo liboso, ayebaki nani akondima mpe nani akondima te. Soki Nzambe azali . . .

⁴⁸ Motuna yango etunamaki lobi, théologien moko atunaki ngai, oyo ayaka na mayangani to ayokaka bande, alobaki: “Motuna moko!” Alobaki: “Boye, Nzambe azalaka nde na-bisika-nyonso? Boye,” alobaki, “Akoki kozala bisika nyonso?”

⁴⁹ Nalobaki: “Azali na-bisika-nyonso te, na lolenge oyo liloba elobi na-bisika-nyonso. Akoki te kozala Ezali, na bongo kozala na-bisika-nyonso. Soki Azali na-bisika-nyonso, mpo na nini obondelaka mpo na kozua Molimo Mosanto? Soki Azali na-bisika-nyonso, Atondisi madusu nyonso, nsonge, kopasuka, cellule nyonso, nsinga ya misisá, mpe eloko mosusu nyonso oyo ezali.” Nalobaki: “Mpo na nini Alukaki Mose, soki Azali na-bisika-nyonso, na esika ya kolala? Mpo na nini Akendeki bipai na bipai na elanga ya Edene, kogángáká: ‘Adama, Adama, ozali wapi?’ soki Azali na-bisika-nyonso?”

⁵⁰ Azali na-bisika-nyonso mpo Ye azali na-boyebi-nyonso. Ayebi nyonso mpo Azali na nsuka te, kozala na nsuka te esali Ye ázala na-bisika-nyonso. Lokola oyo-na-bisika-nyonso, na bongo, lokola oyo-azangi nsuka, na bongo, Afandi na Lola. Afandaka na esika moko mpamba te Ye azali Ezali.

⁵¹ Kasi, lokola oyo azangi nsuka, na boye Ayebi makambo nyonso. Koyebáká mbala nyonso oyo nzinzi ya moke ebetaka liso na yango. Ayebi nzói moko na moko, esika ekendeke kozua mafuta-nzoi na yango. Ayebi ndeke moineau moko na moko oyo eteleme na nzete. Ayebi likanisi moko na moko oyo ezali na lobanzo na yo, mpamba te Azali na nsuka te mpe na-boyebi-nyonso. Elingi koloba, Azali kaka te Ye oyo azangi nsuka, Azali na-boyebi-nyonso, Ayebi makambo nyonso. Kasi Azali Ezali, Nzambe azali Ezali, mpe uta na Ezali oyo nde biloko oyo ebandaki.

⁵² Mpe lisumu, ndenge nalobaki na mpokwa mosusu, lisumu ezali ekelamu te. Eloko moko te ekelámá kozanga bobongi be. Nzambe akelaki biloko nyonso malamumu. Lisumu ezali ekelamu te. Balobaka: “Ee, oyo wana ezali ekelamu mpenza ya lisumu.” Bosílá koyoka yango. Kasi wana ezali libunga. Lisumu . . . Mokeli azali bobele moko, ezali Nzambe. Nzambe akokaki kokela lisumu te, mpamba te Ye azali mosanto, mpe eloko moko te ezali kati na Ye mpo na kokela yango. Lisumu ezali libebi; ekelamu te, kasi ezali libebi. Ekobo ezali likambo ya malamumu oyo ebebisami. Lokuta ezali solo elobami mabe. Lisumu nyonso, lisumu nyonso ezali bolamu ebebisami.

⁵³ Yango wana sikoyo, Nzambe atiaka. Asílá komitalisa Ye moko, Azali Nzambe. Asílá komitalisa Ye moko lokola Mobikisi ya milimo, bato babungaki mpe Ye abikisaki bango. Asílá komitalisa Ye moko lokola Mobikisi ya bokono. Ezosala bokeseni moko te oyo bato balobaka Ye azali; mpe Ye azali motindo moko, ata bongo. Azali Mobikisi ya bokono, Azali Mobikisi ya molimo, Azali Nzambe, Azali Seko. Mpe Azali na mwango. Mpe mwango na Ye, na ebandeli, ezalaki ya kosala bikelamo oyo bakolinga Ye mpe bakokumbamela Ye.

⁵⁴ Mpe Asalaki bikelamo, mpe bikelamo yango ekweyaki. Na bongo Nzambe, na kozanga nsuka na Ye, Akitisaki miso na ebale ya ntango mpe Amonaki moto nyonso oyo alingaki kobikisama. Moto nyonso, Ayebaki yango na libos- . . . na boyebi makambo liboso. Yango wana, soki Ye, na boyebi makambo liboso, ayebaki nani akobikisama mpe nani akobikisama te, Akokaki kobongisa liboso. Boye, liloba yango ezali na yango liloba ya mabe te, nsima na nyonso, boye te? Akokaki kobongisa liboso, mpamba te Ayebaki nani akobikisama mpe nani akobikisama te. Yango wana, mpo na kokanga baoyo bakobikisama, Asengelaki kolengela mbe—mbeka mpo na kolongola masumu na bango. Oh, soki tokokoka, tolingi kolobela yango, etikali kaka ndambo ya milongo. Abongisaki biso liboso mpo na Bomoi ya Seko, koyebáká ete ekozala na baoyo bakotia makambo nyonso pembeni, ata soki ekosala bana ya mokili eloko moko te, yango ekozala na ntina moko te mpo na bango, mpo bazalaki bana na Nzambe. Mpe Abengaki bango.

55 Mpe Atindaki Yesu, mpo Makila na Ye ézala elongoli masumu, elongoli masumu na Makila, mpo na kosala mbondi ya masumu, to ko—koyambama, to kopetolama. Mosala ya kopetolama na ntango nyonso. . . Kaka mbala moko te, na liyangani moko ya kolamuka, kasi “mpo na bomoi mobimba, kosala mosala ya kolobela,” mpo Moklisto ákoba kozala peto, butu mpe moi. Makila ya Yesu Klisto ezali yango nde esalaka ete tó—tóyambama na ekulusu, kuna, na. . . Liboso na Nzambe, ezali kopetola biso ntango nyonso, butu-moi, longwa na masumu nyonso. Mpe tobatelami na kimia nyonso. Tobatelami ndenge nini? Na Molimo Mosanto, kati na Nzoto ya Nkolo Yesu, na bokengi. “Moto oyo akoyoka Maloba na Ngai mpe akondimela Ye oyo atindi Ngai, azali na Bomoi ya Seko mpe akoleka na kosambisama ata moke te, kasi asili koleka longwa na liwa kino na Bomoi.” Kosambisama ezali lisusu te! Moklisto akendeke na kosambisama ata moke te. Klisto akendeke mpo na ye. Molobeli na ngai azuaki esika na ngai. Asambaki likambo na ngai, ete nayebaki likambo te. Ayebisaki Tata ete ngai nalongobanaki te, ete nayebaki likambo te. Kasi Ye alingaki ngai mpe Azuaki esika na ngai, mpe asambaki likambo na ngai, mpe lelo nazali nsomi! Iyo, mesie. Mpe Asopaki Makila na Ye, lokola mbeka, kuna, mpo na masumu na biso.

56 Bómikanisela, na mpokwa ya mokolo ya Misato eleki, Moklisto moko te. . . Moklisto asalaka lisumu, kasi mosumuki akoki kosala lisumu te. Mosumuki asalaka lisumu te, mpo azali mosumuki. Azali kaka mosumuki, mpo na kobanda, mpe esili. Tala, zua nsi—nsima ya buku oyo, ezali moindo, moindo na yango ezali ndenge nini? Ezali nyonso moindo. Mpenze ezali ata na esika moko te, ezali moindo. Okoloba: “*Mwa moke awa.*” Te, ezali bongo te, eloko yango mobimba ezali moindo. Ezali nyonso moindo. Ndenge wana nde mosumuki azalaka. Akweisami mpenza, mpo na kobanda. Ee, okoloba: “Bongo soki asali ekobo? Bongo soki azui mwasi moko na makasi? Bongo soki a—bongo soki abeti lisano ya mbongo? Bongo soki abomi moto na masasi?” Oyo wana etali biso te. Oyo wana etali biso te, tozali na mibeko awa, mpo na kotala likambo wana. Bisó tozali ba-réformateur te, tozali batei ya Nsango-malamu. Tokokweisa ye te mpo na oyo ye asali, tokokweisa ye te mpo asali ekobo. Tokokweisa ye mpo azali mosumuki! Soki azalaki Moklisto, alingaki kosala yango te. Ya solo. Soki abóngwáni, akosala yango te. Kasi lokola azali mosumuki, yango nde esali ete ásala yango.

57 Na esika wana nde ba-légaliste bazangaka e—etelemelo. Iyo mesie. Ndeko mobali, tika náyebisa yo: “Ezali na misala te, kasi na ngolu nde tobikisami, mpe yango, na nzela na kondima.” Iyo mesie. Sikoyo, nakokweisa bandeko ba-légaliste te, bazali bandeko na ngai. Bango mpe bakozala kuna, kaka ndenge moko na bamosusu oyo bakozala kuna, mpamba te Nzambe abongísáki Lingomba na Ye liboso mpo ézala kuna. Kasi likambo ezali

ete, bo—bokangaka bato na bokabwani mpenza, na lolenge ete bayebaka yango te. “Lelo, ee, ntango mosusu soki na—na...” Bóyebisaka bango ete; na ntango nyonso oyo bazali na mposa ya mokili, bazali wana te, mpo na kobanda.

⁵⁸ Nabikaka sémbó epai ya mwasi na ngai te, mpo nakanisaka ete akoki kokabwana na ngai. Nabikaka sémbó epai ya mwasi na ngai mpo nalingaka ye. Ezali mokano oyo elongobani na mobeko, oyo tozui, mpo tolingani. Ya yambo, liboso ete ékoka kosalema, bolingo esengelaki kozala. Nalingaka ye. Ata nandimi ete soki nasali likambo moko ya mabe, akolimbisa ngai, ata bongo, nakosala yango te, ata ndenge nini. Nalingaka ye.

⁵⁹ Lolenge wana nde ezalaka ná Klisto. Soki na—soki nazali na bomoi... Nakómi na mibu ntuku mitano, soki nazali na bomoi kino na mibu ntuku libwa to mokama, soki natikali na mibu ntuku mitano mosusu ya koteya, mpe soki natei lisusu ata mokolo moko te, nakei na ngai kofanda pembeni ya ebale, nasili kobikisama, ata bongo. Nzambe abikisaki ngai na ngolu na Ye, nalongobani na eloko moko te oyo nakokaki kosala, oyo nasálá, to eloko nini mosusu. Nateyaka mpo nalingi Ye mpe nalingi bato na Ye. Mpe yango wana nayebi ete nasili kolongwa na kufa kino na Bomoi, mpo nalingi bango mpe nalukaka bango. Ata bazali na lolenge nini, nalukaka bolamu na bango ata bongo. Nakendeke kozua bango, ata bongo, kobenda bango baya, ata ndenge nini. Soki batei baboyi na bango mpe bato mosusu baboyi na bango, soki ba-denomination baboyi na bango, yango ekopekisa ngai te. Eloko moko ezali! Yango epekisaki Ye te! Ayaki mpenza na kati ya kozanga kondima, kasi epekisaki Ye te, Akobaki kokende liboso, ata bongo. Yango nde oyo tosalaka, tokendeke kozua bango, tokangaka bango, ata bongo. Ata ndenge nini, sémbola loboko, kangá bango, telema ngwi, na makasi na yo nyonso. Oyebi te oyo bango bazali. Bikisa bango. Ezali mpo na bolingo. Ezali te mpo “nasengeli kosala yango,” kasi mpo nazali na bolingo, mpo ozali na bolingo.

⁶⁰ Okoloba: “Nasengeli kokende kobongisa likambo wana ná mwasi wana, kasi, nalobi na yo sikoyo, nakanisi, lokola nasambelaka, ngai nde nasengelaki kokende kobongisa yango.” Te, yo nde osengelaki kobongisa, liboso. Bomoni? Bomoni? Soki ozali na bolingo ya Nzambe na motema na yo te, eloko mosusu oyo eyebisi yo ete ozali na libunga, na bongo kende—na bongo kende kobongisa yango ná Nzambe. Nsima na yango nde okobongisa yango ná mozalani na yo.

⁶¹ Yesu alakisaki likambo yango moko. Alobaki: “Soki oyei na etumbelo, mpe ezali na... omikaniseli ete ozali na likambo ná mozalani to na ndeko, kende kobongisa yango ná ye, liboso.”

⁶² Sikoyo, sikoyo, na bileko oyo ekoya. Mokolo ya Misato na mpokwa, tolobelaki “komonisama”. Tokolobela yango lisusu na ntongo oyo, “komonisama ya bana na Nzambe”. Na elobeli

mosusu, Nzambe azali kozela. Na nsima, na suka ya ntango, ntango biso nyonso tokotelema liboso na Ye. Banje babungaki te. Bango bakoyeba te ndenge ya kosepela na mapamboli lokola biso, batikálá kobunga te. Kasi ngai nayebi esika naúti, nayebi libanga nini oyo nakwakolamaki na yango, mosumuki. Yo oyebi esika nini okwakolamaki. Sikoyo, ntango tosili komonama, boye tokoki kotelema liboso na Nzambe. Oh, ekozala mokolo ya kitoko mingi!

⁶³ Na bongo, kotiana lokumu ya mwana, kotia na esika. Sikoyo, Nzambe azali kosala likambo oyo na ekelá yango. Sikoyo, soki nakoki kotalisa bino likambo yango, bongo tókobanda mbala moko, sikoyo na molongo ya 5, nalingi kotángá Yango.

Abongisaki biso liboso mpo na lokumu ya bana, na nzela na Yesu Klisto, mpo na ye moko, kokonana ndenge mokano na Ye Moko elingi,

⁶⁴ Nzambe asepelaka kosala mokano na Ye, kopesa lokumu ya mwana, kotia na esika. Sikoyo, Azali kosala nini? Azali kotia Lingomba na Ye na esika elongobani. Liboso, Abengaki lingomba na Ye, ba-Methodiste, ba-Prebisterien, ba-Lutherien, ba-Batiste, kobengáká bango. Na nsima, Asalaki nini? Atindaki Molimo Mosanto mpe Apesaki bango libatisi ya Molimo Mosanto.

⁶⁵ Nalingi ete bino ba-Pantekotiste bóbimisa likambo oyo na mitema na bino. Pantekote ezali denomination te; pantekote ezali likambo obikeli. Ezali Molimo Mosanto. Ezali ebongiseli te. Bokoki kokómisa Molimo Mosanto ebongiseli te. Akoyikela yango mpiko te. Sikoyo, bozali na ebongiseli oyo bopesi yango nkombo wana, kasi Molimo Mosanto abimi mpe atiki bino na esika bozali, mpe akobi bobele kokende liboso. Bomoni? Pantekote ezali ebongiseli te; pantekote ezali likambo oyo obikeli.

⁶⁶ Na bongo, Nzambe apesaki bana na Ye Mbotama ya sika, na nzela na libatisi ya Molimo Mosanto. Bakómaki mpenza pembeni na Yango, ntango bamipetolaki bango moko, na nzela ya ba-Nazaréen, ba-Pèlerin de la sainteté. Na nsima babikelaki likambo ya pantekote, to ya libatisi ya Molimo Mosanto, bozóngi ya makabo. Bakendeki kolobáká minoko na sika mpe kolimbola minoko na sika, mpe bapesamaki makabo ya kobikisa babeli mpe ya kosala bikamwa, mpe bilembo ná bikamwisi ebandaki kolanda bango. Sikoyo bazali bana, bazali bana na Nzambe. Batiami na esika na bango kati na Klisto. Bakómi bana na nzela na Mbotama. Mpe Mbotama ya sika, mpe mbongwana Yango moko ezali Molimo Mosanto.

⁶⁷ Obongwani ata te soki ozui naino Molimo Mosanto te. Yango nde oyo Makomi elobi. Yesu ayebisaki Petelo, bótuna moto nyonso, bótángá Likomi na bino, alóngisamaki na kondimeláká

Nkolo Yesu, akómaki moyekoli, ntóma. Yesu apesaki ye bafungola ya Bokonzi. Mpe Yoane 17:17, Ye abulisaki bango, apesaki bango bokonzi, atindaki bango bákende bábengana milimo mabe mpe nyonso wana, abulisaki bango. “Bulisa bango, Tata, kati na Solo na Yo. Liloba na Yo ezali Solo. Nazali komibulisa Ngai moko mpo na bango.”

⁶⁸ Oyo wana ezali moko na maloba ya bopolo koleka natikálá koyóka. “Tata, Nazali komibulisa Ngai moko mpo na bango.” Boyebi ete Azalaki na makoki ya kozala na libota? Azalaki moto. Boyebi mpo na nini Azalaki na makoki ya kozala na mwasi? Azalaki Mobali. Azalaki na makoki ya kozala na biloko nyonso wana, kasi Alobaki: “Tata, Nazali komibulisa Ngai moko mpo na bango. Nazali komibulisa Ngai moko.”

⁶⁹ Nasololaki na mwa motei moko lobi, nakoteya na losambo na ye na mwa bampókwa ekoya, kuna, na nzela ya monene. Natunaki ye na ntina na likambo moko boye, alobaki: “Iyo, Ndeko Branham, kasi mingi na bato na ngai bandimaka yango te.”

Nalobaki: “Mingi kati na bango bazali ba-légaliste?”

⁷⁰ “Iyo.” Ndeko andimaka yango te. “Kasi,” alobaki, “mpo na bango!” Oh, nalingaki koyamba ye na kingo. “Mpo na bango, omoni, nazali komibulisa mpo na bango.”

⁷¹ Oh, Yesu azalaki kolakisa mosala na bato zomi na mibale, ete na nzela ya bato zomi na mibale wana bámema Nsango-malamu na mokili mobimba. Mpe Alobaki: “Nazali komibulisa Ngai moko mpo na bango.” Mibulisa yo moko mpo na mozalani na yo, mpo na moto mosusu. “Kosalela bonsomi na yo lokola ezipelo te,” ndenge Polo alobaki, “kasi mibulisa!” Ezaleli na yo moko na etuká ofandaka, ézala ndenge Moklisto ya solosolo asengeli kobika. Tika ete masolo na yo, soki okutani na monguná na yo, mibulisa mpo na ye, oyebi te eloko nini okoki kosala.

⁷² Sikoyo, kotiyama ya mwana na esika. Eloko ya liboso, nsima na mwana yango kobotama, akomaki mwana, kasi na nsima, tomoni ete ezaleli na ye nde ekobongisa ye mpo na kopesama lokumu ya mwana, soki azalaki na ezaleli ya malamau to te.

⁷³ Ezali ba—ba-pantekotiste . . . Sikoyo bótika nálakisa bino ete Pantekote ezali denomination te. Ba-Batiste boni bazali awa, oyo bazalaki ba-Batiste, baoyo bazuá Molimo Mosanto, bótombola maboko. Bomoni? Ba-Methodiste boni bazali awa, baoyo bazuá Molimo Mosanto, bótombola maboko. Ba-Nazaréen boni bazali awa, baoyo bazuá Molimo Mosanto? Bótombola maboko. Ba-Presbiterien, baoyo bazuá Molimo Mosanto. Bomoni? Ba-Luthérien. Bato ya denomination mosusu, oyo bazalaki bato ya Pantekote ata moke te, bazalaki kaka na denomination moko boye, bazuá Molimo Mosanto, bótombola maboko. Bomoni? Boye, Pantekote ezali denomination te, ezali likambo oyo moto abikeli.

⁷⁴ Sikoyo, Nzambe akotisaki bino kati na Nzoto ya Klisto (Sikoyo eloko nini Asali?) nsima na yo kotalisa makoki na yo, komibulisa na ezaleli na yo ya malamumu, botosi na Molimo Mosanto, etali te nini oyo mokili elobi.

⁷⁵ Na—nakonika likambo oyo makasi mpenza, bomoni, mpo . . . nalingi kozokisa te na maloba na ngai. Na—na . . . nasengi na bino ete, bó—bó—bózala mpenza te, bomoni. Bókanisa ata moke te ete nazali—nazali na nkanza. Na—nalingi kozala bongo te. Oyo elembisaka ngai, ezali ntango nazuaka bato mpe natei bango Solo oyo Nzambe atindi, kasi bakopesa yango mokongo mpe bakokóba kosala kaka makambo yango moko, mpe bakoloba ete bazali na Molimo Mosanto. Esilisaka yo makasi mpenza, bomoni. Likambo yango nini? Bazongelaka kaka makambo yango moko, kaka lokola bana ya Yisraele, balingaki kozala na mokonzi, mpo mokonzi yango ákonza bango mpe ákóma kosalisa bango makambo lokola ba-Amola, ba-Amaléki ná ba-Filistia.

⁷⁶ Boyebi, bino basi, ete ezali mabe kolata pantalon? Boyebi yango? Boyebi ete ezali mabe kokata suki na bino? Oyebi ete ezali mabe, yo mesie, kokoba komela makaya mpe kobika ndenge osalaka? Oyebi ete ezali mabe mpo na yo kozanga kozala mobali na ndako na yo, mwasi na yo asiliki mwa moke mpe abangani yo na ndako, yo mpe olobi: “Iyo, pámbolama, chérie, nakozonga noki na ndako?” Oyebi ete yo . . . Ndenge nini okoki kosala mosala na Ndako ya Nzambe soki okoki ata kokamba ndako na yo moko te? Ezali mpenza ya solo. Oyebi, ndeko mwasi, ete mobali na yo azali kaka mobali na yo te, kasi azali mpe mokonzi na yo? Nzambe nde alobaki bongo. Mpo mobali apengwisamaki te, mwasi nde apengwisamaki. Mpe bino batei, bozali kokóba kokómisa basi bakengeli mpe batei na mangomba na bino, wana boyebi ete Liloba na Nzambe epekisi yango.

⁷⁷ Bozali kokoba kosalela nkombo ya “Tata, Mwana mpe Molimo Mosanto” mpo na kobatisa, nzokande eteni moko ya moke ya Likomi mpo na yango na Bible ezalaka te. Nalingi ete evéke mokonzi moko to moto mosusu álakisa ngai esika oyo moto moko, na Bible, atikalá kobatisama na nkombo ya “Tata, Mwana, Molimo Mosanto.” Nalingi ete moto moko álakisa ngai moto oyo atikalá kobatisama na lolenge mosusu, libanda ya Nkombo na Yesu. Kasi Yoane azalaki te . . . kobatisa, bango babatisamaki kondimáká ete Azalaki koya, kasi bayebaki te nani Ye azalaki. Kasi kaka na ngonga oyo basosolaki yango, basengelaki koya kobatisama lisusu na Nkombo na Yesu Klisto. Nalingi ete moto moko a . . . Na—natúná ba-Assemblée de Dieu, batei mosusu, ba-Batiste, ba-Presbiterien, mpe nyonso wana. Bakolinga te—bakolinga kolobela yango te. Nalingi komona nde Likomi yango.

⁷⁸ Na nsima, ngai nde “fanatique,” hein, na nsima, ngai nde “moto ya liboma,” motó na ngai esalaka malamumu te, ngai nde “elémá,” kaka mpo nazomeka koyebisa bino Solo? Sikoyo, wana ezali—wana ezali bosembo, bandeko. Soki moto amikabi

mobimba na Nzambe, omikabi mobimba, na lolenge nyonso mpe na makambo nyonso. O—o—o—ozali—otiami pembeni, okomi—okómi ekelamo ya ndenge mosusu.

⁷⁹ Mingi babengami, moke baponami. Iyo, bato mingi babengami, oyoki mbela na motema na yo: “Iyo, nandimi ete Nzambe alingi ngai. Nandimi ete Alingi ngai.”

⁸⁰ Kasi, ndeko, ná yango, okobunga lokola bamosusu, mpo bakoya kuna mokolo wana, bakoloba kútu: “Nkolo, nabenganaki milimo mabe na Nkombo na Yo. Nasalaki makambo mosusu nyonso na Nkombo na Yo. Nasalaki mayangani ya kobondela mpo na babeli. Nateyaki Nsango-malamu. Nabenganaki milimo mabe.”

⁸¹ Mpe Yesu akoloba: “Longwa awa, Nayebi ata yo te, moto na bilongi mibale. Ezali ye oyo akosalaka mokano ya Tata na Ngai!” Mpo na nini bato bazokoka komona yango te? Sikoyo, nayebi ete ezali kosala mpasi. Mpe ezali te—ezali te ete nalingi ésala mpasi, ezali te ete nalingi ézala lolenge wana. Kasi, ndeko, na—na . . .

⁸² Ezali komonana mpo na ngai lokola ete tokómi—tokómi na nsuka na ntango, mpe Nzambe azali kotia lokumu na bana, kotia bango na bisika na bango kati na Lingomba, kati na Nzoto na Ye, ya Klisto. Sikoyo, bakozala mingi mpenza te, baoyo Akokotisa kuna, nakoyebisa bino bongo, mpo na kobanda. Okoloba: “Oh, ee, bato bakozala mpenza mingi kuna!” Kasi Asilaki kozua mpe mibu nkóto motoba mpo na kobimisa bango. Bómikanisela, lisekwa ekosalema mpe tokonétolama elongo ná bango. Bakozala mpenza moke, bomoni. Luka óyeba likambo ya lobiko na yo, nokinoki. Mitala malamumu mpo óyeba oyo etamboli malamumu te. Omoni? Bomoni yango mpenza—mpenza nde likambo. Nayebi ete ezali—ete ezali matata, kasi, ndeko, ezali Solo. Ezali Solo ya Nzambe. Kotiama lokumu ya mwana!

⁸³ Tosengelaki kozala na móto mpenza mpo na Nzambe, tosengelaki kosala mosala butu mpe mói. Eloko moko te esengeli kotelemisa biso, mpe tosengeli kozala na boboto mingi mpe na bolamu mingi, mpe malamumu mingi mpe kozala mpenza lokola Klisto na bomoi na biso. Yango esengaka bomoi ya mikolo nyonso. Yesu alobaki: “Bótala folólo lísi ya elanga ndenge ekólaka, esalaka mosala mpe emonaka mpasi; kasi Nalobi na bino ete Salomo, na nkembo na ye nyonso, alataki lokola moko na yango te.” Salomo azalaki na banzambala oyo ezalaki ya nkembo mingi, ya swá, oyo etongami na ntonga mpe nyonso wana, kasi yango—yango. . . kasi oyo wana ezalaki te oyo Ye azalaki kolobela. Mpo folólo ya lísi ékóla, esengeli kosala mosala butu ná moi. Mpo na nini okolinga kokende kokangama na mwa nsuka ya singa? Soki moyengebene akobika na mpasi, boye ekozala boni na mosumuki, oyo azali mozangi kondima, ná motioli-Nzambe, moto oyo ayoki Liloba kasi aboyi

kotambola kati na Yango...? Sikoyo tokosala nini? Bomoni? Sikoyo, wana...

⁸⁴ Oyo ezali, sikoyo, oyo ezali losambo na biso. Tozali ntango mosusu na bapaya minei to mitano katikati na biso. Kasi oyo ezali losambo, nazali koteya bino malakisi. Oyo ezali kotiamana ba-bande. Nalingi ete bato oyo bakoyoka ba-bande bábosana te oyo ezali mpo na losambo na ngai. Libanda kuna katikati ya bato, namekaka kozala na bopolo ya kokoka mpenza mpo na koyebisa bango yango, kotikala elongo ná bango, kokoka kobondela bango mwa moke na makanisi na bango ya miliki oyo balongólá mafuta. Kasi ntango ekomaka mpenza likambo ya kofandisa Solo, tika tófandisa Yango.

⁸⁵ Kotiama lokumu ya mwana, kotiamana na esika elongobani! Bakómi wapi? Bólakisa ngai epai wapi bakómi. Nzambe azali kobenga bana na Ye pembeni, na nzela na kotalisama. Bazali na ntina ya koloba liloba moko te na ntina na yango, bozomona ete eloko moko esalemi. Kotia mwana na Ye na esika elongobani, kotia ye na molongo, ná makambo ndenge moko mpenza. A—akómi na bokonzi ndenge moko, liloba na ye ekómi na motuya kaka ndenge moko ná mokóló na Banje, koleka mpenza. Ntango mwana azalaki kopesama lokumu, bazalaki kotia ye na esika moko ya likoló, kofandisa ye kuna, kobongola bilamba na ye, kobongola lángi na ye. Tata azalaki kosalisa molúlú, koloba: “Mwana na ngai ye oyo, kobanda sikoyo akómi moyangeli. Akómi mokambi. Azali likoló na libúla na ngai nyonso. Nyonso oyo ngai nazali na yango ezali ya ye.” Ya solo. Na bongo, tokokaki kozongela Elah, Elohim, Elohim moko yango, bomoni, epai oyo Azali kobika-na-Ye-moko. Na nsima, kozonga na likambo ya Jehovah, Oyo akelaki eloko moko, Apesaki moto bokonzi ya mokili. Tozali kozela nini? Kotalisama. Mokili ezali kokimela. Tózua likambo yango mpe tótánga yango. Malamu.

... Abongisaki biso liboso... mpo na lokumu ya bana, na nzela... ye moko, kokokana ndenge mokano na Ye elingi,

Mpo na masanz-... mpo na masanzoli ya nkembo ya ngolu na ye,...

⁸⁶ Ngolu na Ye ezali nini? Kala, liboso, ntango Azalaki naino Tata te; ngolu na Ye, bolingo na Ye, Amisalaki mwana, mpo tóbongisama liboso mpo na kotiamana lokumu ya bana, mpo na masanzoli ya ngolu na Ye. Bomoni?

... oyo na nzela na yango ayambi biso na nzela na— na (Moto) molingami, elingi koloba Klisto.

⁸⁷ Ayambaki biso ndenge nini? Na nzela na Ye. Ndenge nini tokotaka kati na Ye? Na Molimo moko, biso nyonso tobatisami kati na Ye. Bóyoka.

Na ye tosikolami, tosikolami na nzela na makila na ye (mpenza), tolimbisami na m-a-s-u-m-u... .

⁸⁸ Ndenge nini okoki koteya kobongisama liboso, ya Nzambe oyo akánaka liboso mpe atiaka na esika, soki bolimbisi ya masumu ezali te esika moko boye? Mpo na nini? Mokolo nyonso osalaka libunga, mokolo nyonso osalaka mabe. Kasi soki obotami mbala ya mibale, mobali to mwasi, kaka ntango osali libunga, Nzambe ayebi ete oyoki mawa mpo na yango. Okoki kotelema liboso ya—ya Président Roosevelt to nani mosusu, mpe koloba: “Nakweisami, Nzambe limbisa ngai mpo na likambo oyo.” Mpo na nini? Esika wana nde Makila mpo na bolimbisi masumu ezali. . .

⁸⁹ Bótala malamumu “m-a-s-u-m-u” wana. Mosumuki azali mosumuki, asalaka masumu te. Kasi lingomba esalaka masumu, esalaka mabe, ezuaka likanisi ya mabe, ekanisaka mabe, esalaka mabunga, etenga-tengaka lokola mwana moke azotambola, komekáká koyekola ndenge ya kotambola. Ayebi naino kotambola malamumu te, mpamba te azali mwana moke. Kasi tozali na Loboko moko oyo esembolamaka kokita soki biso. . . esimbaka biso mpe etelemisaka biso ngwi, mpe elobaka: “Tia litambe oyo lolenge *oyo* boye, mwana.” Atelemisaka biso te mpo na kobeta biso mbata na nsima mpo tosali libunga, Abetaka biso mpo na koboma biso te, mpo tozomeka kotambola. Alingaka biso ndenge tolingaka bana na biso.

⁹⁰ Papa oyo ya solo, oyo ya solo akobeta mwana na ye fimbo te ntango azomeka kotambola, soki akwei na nse. Ye akosembola loboko oyo ya monene mpe makasi, mpe akotelemisa ye, akosimba ye na maboko mibale, mpe akoloba: “Basalaka yango nde boye, mwana. Tambola *boye*.”

⁹¹ Lolenge wana nde Nzambe asalaka mpo na Lingomba na Ye! Ye asembolaka loboko mpe amemaka ye na loboko na Ye, atelemisaka ye mpe alobaka: “Tambola *boye*, mwana. Tala, ko—ko—koloba yango ndenge wana te, loba yango *Boye*. Sikoyo, etali ngai te oyo lingomba elobi, nini *oyo* elobi, nini *oyo wana* elobi, yo loba yango ndenge *Oyo*. Ndenge *Oyo*, oyo nde Yango! Soki Liloba na Ngai etei Yango, yo kangama na Yango, tambola ná Yango. Kangama na Yango. Etali te eloko nini bato mosusu nyonso balobi, yo kangama na Yango. Tambola lolenge *Oyo*. Lolenge oyo nde okotia matambe na yo.”

⁹² Masumu na biso; bolingo ya kolimbisa masumu na biso, soki te tolingaki kozua yango ata moke te. Tokoki mpenza kokangama na Maloba yango, lokola lóngo!

. . . kokokana na ngolu na ye efuluki mingi mpenza;

Epai wapi a—asili kotondisa. . .

⁹³ “Kotondisa” ezali nini? Oh la la! Epai wapi *Atondisaki*, “mipiko minene na yango.”

. . . asili kotondisa biso na bwanya mpe mayele nyonso;

⁹⁴ “Mayele, bwanya nyonso oyo Asili kotondisa biso na yango.” Na “bwanya” nyonso, oyo ya mokili te. Bwanya ya mokili ezali bolema epai na Ye, mpe bwanya ya Nzambe ezali liboma epai na mokili. Kaka lokola mói ná butu, moko akoki koyokana na oyo mosusu te. Kasi ntango mói ebandi kobima mpe mokolo eyei, butu epalanganaka bipai na bipai. Mpe ntango Pole ya Nsango-malamu ebandi kokóta, makambo nyonso ya mokili ebandi na yango kolimwa. Bongo yango esalaka nini? Akotondisa pole ya Mói likoló ya bana na Ye, oyo bazali kotambóla na Molimo, bakambami na Molimo na Nzambe, batondi na ngolu na Ye, na mayele mpe bwanya nyonso, na lisosoli, mpe na molende ya koyeba ndenge ya kotambola. Soki omoni ete ezali mabe, na bongo, keba na oyo ozali kosala, na ndenge yo. . . Soki ezali mabe, keba ata na ndenge okobelema na likambo yango. Mayele! Zala mpenza na ekenge, ndimisama mpenza ete oyebi ndenge ya kobelema na likambo yango. Bwanya lokola nyoka, bopolo lokola ebenga. Yango nde likambo oyo Yesu alobaki.

⁹⁵ Oh, oyo ezali mabanga ya ntálo, baninga! Tokoki kotikala kolobela yango mokolo na mokolo. Ezali mpenza kitoko, boye te? Mayele, bwanya, Ye asili kotondisa biso na yango, asopi yango meke! Ye apesi biso lútu na yango te, kasi azui páwu ya monene mpe akobi kobwaka yango ndenge wana. Atondisi biso, na bwanya mpe mayele ya ngolu na Ye! Oh, ngolu ya kokamwa, koyoka yango ezali elengi!

Sikoyo, asili *kotondisa biso na bwanya . . . na mayele nyonso*;

Ayebisaki na biso libombami ya mokano na ye, . . .

⁹⁶ Azali koloba na banani? Ba-denomination? Nasengi bino, bandeko na ngai, bókanisa te ete nazali kokitisa denomination na bino, ezali bongo te. Nazomeka koyebisa bino ete ezalaki eloko ya lokuta, mpo na kobanda. Yesu alobaki: “Bókende koteya Nsango-malamu,” biso tokendeki mpe tosalaki badenomination. Yange nde ntina oyo tozali na Yango te, tozali kotambola kokokana na bwanya ya bato. Soki Calvin akokaki kosekwa!

⁹⁷ Ee, natelemaki, kala mingi te, pembeni na nkunda ya moto monene moko, réformateur monene moko. Mpe namilobelaki: “Azalaki mpenza moto monene!” Azalaki mpenza bongo! Ee, e . . . nakolinga te. . . Ezalaki John Wesley. Mpe namilobelaki: “Soki John Wesley akokaki kosekwa longwa na nkunda oyo lelo mpo na komona lolenge ya lingomba na ye, akoyoka nsoni mpo na nkombo na ye!” John Wesley azalaki moto na bulee, kóni oyo euti na móto, ndenge azalaki kobenga yango. John Wesley azalaki mosanto oyo andimelaki Nzambe, mpe alandaki Ye litambe moko na moko. Kasi nsima na John kokufa, balobaki: “Tokosalela John lingomba moko, boye tokozala na lingomba moko, mpe tokobenga yango lingomba Methodiste, mpo

na motindo na ye ya kobulisama, oyo ezali mosala ya mibale ya ngolu.”

⁹⁸ Na bongo basalaki lingomba moko, mpe lelo bato ya lingomba yango bazali koboya makambo nyonso oyo John Wesley abundelaki. John Wesley azalaki koteya lobiko na nzoto ya bonzambe. John Wesley azalaki kondima libatizi ya Molimo. John Wesley azalaki kondima na bozongisi mobimba ya makabo. John Wesley, Martin Luther, mingi kati na bato minene wana balobaki minoko na sika mpe balimbolaki yango. Kasi, lelo, soki olobi minoko na sika na lingomba Metodiste to lingomba Luthérien, bakobwaka yo libanda. Likambo yango ezali nini? Ezali ntango mpenza oyo tosengelaki kotia bana na bisika na bango, likambo yango ezali nini? Basili koyamba likambo mosusu, mpamba te bayebi libombami ya Nzambe te. Mpe bakotikalá koyeba Yango na nzela ya likindo te!

⁹⁹ Bótika nátángela bino likambo moko. Ezali likambo te? Malamu. Tózua, nazali na eloko moko nakomaki awa. Tótala ndenge Polo . . . Sikoyo, tala, ye nde molakisi ya Nsango oyo. Tókende na Misala 9:5, na miniti moke kaka. Bóyoka ndenge Polo azuaki Emoniseli oyo, ya oyo esalemaki. Sikoyo, na Misala 9, tóbanda kotánga, boye. Oyo ezali kelasi ya mokolo ya Lomingo, boye mpo na nini te—mpo na nini kotánga yango te? Bóyebisa ngai soki nazali libanda na . . . ? . . .

Nde Saulo, azalaki naino kokanela . . . (Oh, mwa Moyuda wana ya zolo egumbáma, ya nkanda mpe nkanza!) . . . koboma bayekoli ya Nkolo, akendeki epai ya nganganzambe mokonzi,

Mpe asengaki ye mikanda mpo na sinagoga, oyo ezali na Damasi, mpo soki akuti . . .

¹⁰⁰ “Nakokende koluka bango! Soki kaka nazui bango, nalobi na yo, oyo nakosala bango!” Bomoni? “Soki kaka nazui bango!” Kasi azalaki moponami!

¹⁰¹ Ndenge nini oyebi ete motéki lotoko wana, oyo awa, abongisama liboso te mpo na Bomoi? Ndenge nini oyebi ete mwasi ya ndumba wana na balabala, oyo olingaka ata kolobisa te, oyebi ndenge nini ete mwa mbote ya loboko wana mpe kobengisa ye na losambo ekokómisa ye mosanto ya Nzambe te, kuna na Nkembo? Ntango . . . Ndenge nini oyebi ete azali yango te? Yango nde oyo biso toyebi te. Kasi ezali lotomo na biso. Lokola molóbi mbisi oyo abwaki monyama na mbu mpe abendi yango, azui magbóródó, mbisi, mísélékété, ba-araignée ya mai, ná biloko mosusu, kasi mosusu kati na yango ezalaki mbisi. Ayebaki te, ye abwakaki kaka monyama. Yango nde oyo biso tosalaka. Bótala malamu Polo.

. . . asengaki mikanda mpo na basinagoga oyo ezali na Damaseke, ete soki akokuta moto nyonso, oyo azali moto ya nzela oyo, mibali to basi, ákoka kokanga bango

mpe komema bango na *Yelusaleme*. (Ndeko, azalaki mpenza matata!)

Mpe wana azalaki kosala mobembo, abelemaki na Damaseke, mpe na mbalakaka pole moko engengaki zingazinga na ye . . .

102 “Nganganzambe moko ayaki na nzela, Docteur F. F. Jones, mpe alobaki na ye: ‘Osengeli kobikela likambo ya—ya likindo, sikoyo, mwana, mpe nakanisi ete Nzambe akoki kosalela yo.’” Elingaki kozala Likomi moko ya nsomo, kotánga yango ndenge wana, boye te? Sikoyo, ezali mpenza na bomoto . . . Nazoloba yango mpo na kosekisa te. Yango nde oyo biso, ezali mpenza na bomoto, ndenge tozali kokómisa yango lelo. “Oyebi, mama na yo azalaki mwasi malamumu, nakanisi ete olingaki kozala motei malamumu.” Bótala malamumu likambo oyo esalemaki.

Mpe wana—wana azalaki kosala mobembo, abelemaki na Damaseke, mpe na mbalakaka engengaki zingazinga na ye, pole moko . . . (Fiuu, ebandi na ekamwiseli!) . . . pole moko eutaki na likoló:

Mpe akweyaki na nse, mpe ayokaki mongongo moko koloba . . . Saulo, Saulo mpo na nini ozali konyokola ngai?

Ye alobaki ete: Yo nani, Nkolo? Mpe Nkolo alobaki na ye ete: Ngai Yesu, oyo yo ozali konyokola: mpe ezali mpasi mpo na yo kokuta makolo na makonga.

Mpe alengaki mpe akamwaki, mpe alobaki ete: Nkolo, olingi . . . násala nini? Mpe Nkolo alobaki na ye ete: Telema, mpe kota na engumba, mpe bakoyebisa yo oyo osengeli kosala.

103 Mpe bato oyo bazalaki kosala mobembo elongo na ye, bakobaki mobembo, mpe bakutanaki na mobali moko. Anania, kuna, amonaki emononeli. Ekamwiseli na mobimba mpenza! Mpe mobange Saulo, mobange moto na nkanza wana! Anania amonaki emononeli, autaki komona yango na ndako na ye. Azalaki mosakoli, azalaki kobondela na ndako na ye, mpe amonaki emononeli. A . . . Nkolo asololaki na ye mpe alobaki: “Moto moko azali koya na nzela, kuna, ná miso ekufa mpenza lokola ngembó, mpe nkombo na ye Saulo, ye nde Saulo ya Tarse.”

104 Alobaki: “Nkolo, nasila koyoka makambo mingi. Kotinda ngai te, nazali moto moke. Kotinda ngai nálanda ye te.”

105 Alobaki: “Kasi, tala, ntango azalaki koya awa, Namonisaki ye emononeli. Nabimelaki ye na Likonzi na Móto. Nakómisi ye mokufi miso mpenza. Mpe esengelaki Náboma ye miso mpe nábuka-buka ye, liboso ete Nákoka kosala eloko moko na ye. Omoni, Nasengelaki kopomola likindo na ye nyonso. Boyebi, azalaki—azalaki—azalaki moto monene na moko na mangomba kuna. Azalaki na ba-diplôme ya ndenge na ndenge, azalaki na

ntina ya kotánga lisusu likambo moko te, kasi,” Alobaki, “oyo Nasengelaki kosala ezali kobimisa nyonso wana kati na ye.”

106 Yango nde ezalaki likambo yango. Ezalaki te kokótisa mingi koleka na kati na ye, kasi kobimisa yango kati na ye. Nabanzi yango nde likambo na ebele ya basambeli na biso lelo; kobimisa oyo ezali kati na bino, mpo Nzambe ákoka kokotisa Molimo Mosanto na kati na bango. Bimisá yango! Kuna, alobaki a . . .

107 Mpe alobaki: “Nkolo, kasi mo—mo—mobali oyo azali moto moko ya nsómo.”

108 Alobaki: “Kasi, tala, azali kosambela. Sikoyo, okokita na balabala songolo mpe okokóma na liziba moko. Okoleka liziba yango na ngámbo ya mwasi, mpe okokoba kotambola. Ndako moko ya mpembe ekozala wana, mata mpe beta na ekuke. Alali na ye wana, na kokota ya ndako, nde esika mpenza batikaki ye. Tiela ye maboko, mema ye na ebale ya Damaseke mpe batisa ye na Nkombo na Yesu. Mpamba te, Nakoyebisa yo likambo oyo Nalingi kosala, akosengela konyokwama mingi mpenza mpo na Ngai, mpo azali motindami na Ngai epai na bato ya Mabota.” Amen!

109 “Ee, sikoyo, zela mwa miniti, Nkolo! Sikoyo, nápesa ye toli ya kokóta eteyelo nini?” Nakoyebisa bino nini tokosala, tótánga na Bagalatia mpo tómona yango. Kaka mokapo oyo—oyo elandi na nsima. Tóluka Bagalatia 1, tóbanda na molongo ya 10, tótala eteyelo nini oyo Polo alandaki, séminaire nini, mpe nani atielaki ye maboko, mpe, oh, makambo nyonso oyo esalemaki. Bagalatia, mokapo ya 1. Mpo na kowela ntango, tóbanda epai balobeli mbongwana na ye, na molongo ya 10.

Bongo sikoyo, nazali koluka kondimisa nde bato to Nzambe? to nazali nde koluka kosepelisa bato? Mpo soki nazali naino koluka kosepelisa bato, nazali moombo na Klisto te.

110 Oh la la! la la! la la! Bótika náloba mwa likambo moko liboso ya oyo awa. Bagalatia 1, bózua mokapo ya 8. Bato boni bayebi ete Polo moto asalaki ete bato wana bábatisama lisusu na Nkombo na Yesu, na Misala 19? Na ntembe te. Tózua mwa likoló awa, molongo ya 8—ya 8.

. . . soko biso, to mwanje na likoló, akosakwela na bino nsango-malamu ekeseni na oyo esakwelaki biso bino, tika ete álakelama mabe.

111 Ozuaki Nsango-malamu oyo wapi, Polo? Molongo ya 9.

. . . elobaki biso liboso, nazali koloba na bino lisusu sikoyo, Soko nani akosakwela na bino nsango-malamu ekeseni na oyo bosili koyoka, koyamba, tika ete álakelama mabe.

112 Soki azali mokóló na banje, soki azali évéke, soki azali surveillant général, soki azali Docteur Songolo-pakala, ázala

nani, soki atei libatisi ya máí te na Nkombo na Yesu Klisto, libatisi ya Molimo Mosanto, soki atei bozongisi ya makabo te, Boyei ya Klisto, makambo nyonso wana, tika ete álakelama mabe! Soki ameki kozua eteni moko ya Liloba awa, mpe koloba ete ezalaki mpo na eleko mosusu, mpe kobakisa likoló na yango likanisi moko ezangá ntina, oyo toyekolaki na séminaire moko boye, tika ete álakelama mabe!

¹¹³ Tókoba kotánga, komona ndenge nini Polo azuaki yango, komona ndenge nini, likambo oyo nazomeka koyebisa bino na ntango oyo.

Bongo sikoyo, nazali koluka kondimisa nde bato to Nzambe? to nazali nde koluka kosepelisa bato? mpo soki nazali naino kosepelisa bato, na bongo nazali moombo ya Klisto te.

¹¹⁴ Ndenge nini nakoki kotalela eloko mosusu, ndenge nini moto oyo alingi Nzambe, mpe koleka mingi motei, akoki koluka kosala eloko moko, bongo kozanga koyinama na bato? Bato bakoyina yo. Ee, balobaki. . . Yesu alobaki: “Soki Ngai, Mokóló ndako, babengi Ngai. . . Nazali Mokóló, monene koleka bino nyonso. Ngai nde Oyo akoki kosala bikamwa mingi mpe kosala mingi na nzela na Molimo Mosanto, koleka bino nyonso, mpo Nazali na litondi mobimba kati na Ngai. Mpe soki babengi Ngai ‘Belezebula,’ koleka boni bakobenga bino bongo? Kasi,” alobaki, “bómitungisa te na ntina na oyo bokoloba, mpo ekozala bino te nde bokoloba, Tata oyo afandi kati na bino nde akoloba na ntango wana. Bino bókangama kaka na Liloba.” Mpe Ye, ntango Asilisaki kokoma Buku yango, Alobaki: “Moto nyonso oyo akolongola Liloba moko na Buku oyo to akobakisa liloba moko na Yango, ndenge moko ekolongolama na Buku ya Bomoi, mpo na ye.” Nzambe sunga biso tókangama na Yango!

¹¹⁵ Sikoyo molongo oyo elandi, tika nátánga sikoyo, nátánga yango noki-noki sikoyo.

Kasi nazali koyebisa bino. . . (Elakisi, komema bino na kosambisama.) Nazali koyebisa bino, bandeko, ete nsango-malamu oyo esakolamaki na ngai euti na bato te.

“Sikoyo, nazali Metodiste te, Batiste te, Presbiterien te, to Pantekotiste te; euti na bato te. Mpe. . .”

Mpo nazui yango na moto mpe te, nalakisami yango mpe te, . . .

¹¹⁶ “Natikálá kozua yango na moto ata moke te, na séminaire moko te, na molakisi moko te, na bonzambe moko te, na eteyelo moko te. Natikálá kozua yango ndenge wana te, natikálá koteya yango ndenge wana te, natikálá kokutana na yango ndenge wana te, etikálá koyela ngai na ndenge wana te.” Eyaki ndenge nini kasi, Polo?

...nalakisami yango mpe te, kasi na nzela na emoniseli na Yesu Klisto.

117 “Ntango Klisto amimonisaki Ye moko na ngai, ete Azali Mwana na Nzambe, ntango Likonzi na Móto wana ekitaki likoló na ngai mokolo wana, nalobaki: ‘Yo Nani, Nkolo?’ Alobaki: ‘Ngai nazali Yesu.’”

118 Sikoyo, nakolakisa bino likambo oyo—oyo ekómelaki ye. Sikoyo, lelo, soki moto abikeli likambo, bakolinga ete áyekola ki-Greki mibu zomi, mpe mibu zomi misusu mpo na koyekola eloko mosusu, mpe na ntango wana, asili nye. Bótala.

...nazui yango na moto mpe te, nalakisami yango mpe te, kasi na nzela na emoniseli na Yesu Klisto.

Mpo boyokaki nsango ya bizaleli na ngai ya kala na losambo ya Bayuda, . . .

119 “Nazalaki molakisi monene, tala. Nazalaki na nyonso.” Ayekolisamaki na Gamaliele, molakisi ya monene koleka na ekólo mobimba. Bato boni bayebi ete Gamaliele azalaki moko na balakisi ya monene, ya minene koleka? Iyo misie. “Eyamba na ngai ya Moyuda, tala, nayebaki yango malamú mpenza; nayebaki nyonso wana, lolenge ya koloba Esákólá ya Bantóma, ná makambo nyonso wana, bomoni. Nayebaki lolenge ya koloba mabondeli nyonso ya ntongo mpe kopambola bato.” Bomoni?

...nazalaki konyokola mingi mpenza, na ntango wana, lingomba ya Nzambe mpe kobebisa yango nye:

“Ndenge nazalaki komeka kopekisa etónge ya batúntuki wana!” Bomoni? Bomoni?

Nakómaki mosika na kati ya eyamba ya Bayuda . . .

120 “Nazalaki moto monene. Tala, nazalaki mpenza . . . nakómaki mosika, nalakisaki bango ete nakokaki konyata bango, mpamba te nabomaki Etiene mpe nasalaki makambo mosusu mingi. Bomoni makambo oyo ngai nasáláki!” Ndenge mpenza azalaki konyokola bato!

Nakómaki mosika kati na eyamba ya Bayuda, koleka baoyo mingi ya mibu na ngai, na ekólo na ngai, mpo nazalaki na molende mingi mpenza mpo na momesano ya batata na bango.

121 Sikoyo, bómikanisela, mpo na Liloba na Nzambe te, kasi mpo na “momesano ya batata,” momesano ya lingomba, na elobeli mosusu. “Nabanzi ete nazalaki Metodiste kino na mikuwa, nazalaki Batiste kino na mikuwa, nazalaki Pantekotiste kino na mikuwa.” Oh, ezali nde bongo? Ngai nalingaka kozala Nzambe kino na mikuwa. Iyo, ezali bongo. Bomoni? Malamú.

. . . mimesano ya batata na ngai.

Kasi ntango esepelisaki Nzambe, . . . (oh, oh, Polo, tala yango oyo) . . . oyo aponaki ngai uta na libumu ya mama

na ngai, oyo kutu amemaki ngai na mokili oyo, mpe abengaki ngai na ngolu na ye,

Komonisa Mwana na ye kati na ngai, . . .

¹²² Ndenge nini? “Molimo Mosanto kati na ngai! Esepelisaki Nzambe ete ázua ngai, oyo aponaki ngai uta na libumu, ete ápesa ngai Mwana, elingi koloba Molimo Mosanto na lolenge ya Molimo, kati na ngai, mpo Ámimonisa kati na ngai.” Oh la la! Fiuu! Na—na—nakanisi ete nayoki mposa ya koganga mwa moke.

¹²³ Tala, tika náyebisa yo, ndeko. Ntango esepelisaki Nzambe! Oh, aleluya! Ntango esepelisaki Nzambe! Tata molángui masanga. Mama . . . Nzambe ápambola yo, mama, nazoloba mabe na yo te. Kasi mama oyo ayebaki Nzambe te, kaka ndenge lapin ayebaki sapato ya neige te. Mpe tata oyo azalaki kolala na kolángwa masanga na babalabala. Mpe nazalaki ata na sapato te mpo na kokende na kelasi, ná suki milai kino na kingo, mpe bato nyonso bazalaki koyina ngai mpo nazalaki moto ya Kentucky, awa na Indiana. Mpe ndenge, oh, ezalaki mpenza kitoko te na kotala. Kasi esepelisaki Nzambe! Amen! Esepelisaki Nzambe, oyo aponaki ngai uta libumu ya mama na ngai, ete Ákoka komonisa Mwana na Ye kati na ngai, na kokómisáká ngai motei ya Liloba, oyo akokangama sémba na Yango, oyo akomona bimononeli, bilembo mpe, bikamwiseli ná bikamwa. Mpe, oh la la!

¹²⁴ Bomoni eloko nini Ye azalaki kolobela? Esepelisaki Nzambe mpo na kosala yango! Ndenge nini? Bóyoka na bokebi. “Ete ámon- . . .” Bózua molongo ya 16 sikoyo.

Komonisa Mwana na ye kati na ngai, ete násakola ye na bapakano; nasololaki mbala moko na lingomba te:

¹²⁵ “Nakendeki epai na evéke moko te mpo na kotuna ye ndenge nasengelaki kosala. Nakendeki epai na mosuni mpe makila moko te, na bibongiseli te to na eloko mosusu te. Nazalaki na eloko ata moko te ya kosala na yango. Natunaki toli na nzoto mpe makila te. Nakendeki mpe na Yelusaleme te, epai ya banganganzambebasantu minene nyonso mpe batata-basantu, mpe bango nyonso wana, mpo na koloba: ‘Sikoyo, boyebi, namonaki emononeli moko, násala nini mpo na yango? Namonaki mopambolami Nkolo Yesu na emononeli.’ Balingaki koloba: ‘Longwa awa, yo! Nini . . . Motúntuki moko boye! Ee, likambo nini ekómeli yo?’ Te, nazalaki na ba-diplôme nyonso na bango, mpo na kobanda. Nasengelaki . . .”

¹²⁶ Mpe Polo alobaki awa, nakoki kolakisa bino yango na Likomi, alobaki ete asengelaki kobosana makambo nyonso atikálá koyekola, mpe komona yango mpamba, mpo ákoka koyeba Klisto. Oh!

Nakendeki mpe na Yelusaleme te, epai ya baoyo bazalaki bantóma liboso na ngai; kasi nakendeki na Arabia, mpe nazongaki lisusu na Damaseke.

Mpe nsima na mibu misato, nakendeki na Yelusaleme mpo na kokutana na Petelo, mpe nafandaki na ye mikolo zomi na mitano.

127 Mpe wana tokobi kotánga, tomoni ete ye ná ntóma Petelo bamónánáká ata mokolo moko te, na bomoi na bango, bayébánáká ata mokolo moko te, bamónánáká ata mokolo moko te, kasi ntango bakutanaki, bazalaki koteya Nsango-malamu moko. Nzambe azalaka na kelasi moko. Bomoni? Iyo!

128 Petelo azalaki awa, atelemaki na Mokolo ya Pantekote, alobaki: “Bóbongola mitema, moko moko na bino, bóbatisama na Nkombo na Yesu Klisto, mpo na bolimbisi ya masumu na bino, mpe bokozua likabo ya Molimo Mosanto.”

129 Filipino alobaki: “Oh, oyo ezali likambo ya nkembo mingi! Ngai mpe nasengeli kosala likambo moko. Kuna na . . . Nazui mbela moko ya kokende kuna na Samari.” Akendeki kuna mpe abandaki kotatola na balabala. Na mbala moko, mobeli moko apusanaki, atielaki ye maboko, mpe abandaki kopumbwa mpe kopumbwa-pumbwa. Alobaki: “Nkembo na Nzambe, ezali yango mpenza!” Abandaki kokóma na liyangani ya monene. Alobaki: “Bino nyonso bozali na bosenga ya Molimo Mosanto.” Alobaki: “Oyo bosengeli kosala ezali ete bosengeli kobatisama na Nkombo na Yesu.” Boye, amemaki bango nyonso kuna mpe abatisaki bango nyonso na Nkombo na Yesu. Alobaki: “Yaka, Petelo, kotielala bango maboko sikoyo.” Mpe bazuaki Molimo Mosanto.

Petelo, kuna na ndako ya Korneyi, ndenge moko.

130 Polo atikálá ata komona ye te to koyoka eloko moko te na ntina na ye. Kasi alekaki na bitúka ya likoló ya Efese, mpe akutanaki na bayekoli moko. Akutanaki na motei moko ya Batiste, Apolosi, azalaki, molobeli mibeko oyo asilaki kobongwana, moto ya mayele, mayele mingi, azalaki kozua Kondimana na Kala mpo na kotalisa na nzela na Yango ete Yesu azalaki Mwana na Nzambe. Iyo, misie, azalaki moto na mayele. Mpe bazalaki kogánga, bazalaki kosepela. Biblia nde elobi bongo. Bótánga mokapo ya 18 ná 19 ya Misala mpo bóyeba soki ezali ya solo te. Bazalaki kosepela, bazalaki kobina na Molimo, mpe kopota mbangu bipai nyonso, boyebi. Polo alobaki: “Kasi bozuaki Molimo Mosanto uta bondimaki?”

131 Mpe bino bandeko ba-Batiste, oyo bolukaka komelisa bato likambo yango na makasi, mpe bolobaka ete maloba ya ki-Greki ya ebandeli elobaki: “Bozuaki Molimo Mosanto uta, to, ntango bondimaki?” Nabeti na bino móndengé, bóyela ngai maloba ya ki-Greki yango! Nazali na maloba ya ki-Greki ya ebandeli.

Nazali mpe na oyo ya ki-Araméen, ná ya ki-Hébreu. Moko moko na yango elobi: “Bozuaki Molimo Mosanto *uta* bondimaki?”

¹³² “Bobikisami na kondima,” Yango nde kondima na yo epai na Nzambe. Makila ebatelaka yo peto mosika na lisumu, mpo esalaka mosala ya mbeka. Makila ebikisaka yo te, Makila ebatelaka yo peto. Bobikisami ndenge nini? “Bobikisami na kondima,” mpe yango, na makoki ya Nzambe ya boyebi makambo liboso, nde ebengaki bino. Bobikisami, mpe Makila ezali kolongola masumu, ezali ntango nyonso kobatela bino peto. Mpe lisusu, na nzela na Molimo moko, bobatisami kati na Molimo Mosanto, kati na bondeko ya bandimi, mpe kati na bondeko ya Molimo Mosanto, mpo na kokambama na Molimo, kosala bilembo mpe bikamwa.

¹³³ Bózela, ezali koya, nazozeláká eloko moko, tokolobela yango kala mingi te, nazolikya ete tokosala yango, ata bongo. Nayebisaki yo óyebisa ngai na ngonga oyo, boye te? Esalemi ete natalaki yango. Etikali kaka—kaka liloba moko to mibale. Kaka . . . Ezali—ezali naino mwa moke.

¹³⁴ Lobiko oyo ezali koumela ntango boni, ntango boni? Ezali lobiko ya lolenge nini? Longwa na lingomba moko kino na lingomba mosusu? Longwa na . . . Tózua Baebele 9:11, kaka miniti moko, kaka—kaka mpo na komona ntango boni, kaka mpo na mwa miníti. Bóbalola na Buku ya Baebele mpo tó—tómona soki lobiko oyo ezoumela ntango boni. Tómona lobiko ya ndenge nini yango ezali. Tótánga sikoyo Baebele 9:11.

Kasi Klisto akómaki nganganzambe mokonzi ya makambo malamú oyo ekoya, alekaki na mongombo ya monene koleka mpe oyo ebongi be koleka, oyo esalemi na maboko ya bato te, elingi koloba, . . . (Sikoyo oyo ezali molakisi yango moko, Polo, bomoni.) . . . ezali te ya ezalisi . . . ya ezalisi oyo;

Akoti na makila ya bantaba to bana-ngombe te, kasi na makila na ye moko, mbala moko mpo na libela (mbala boni? Mbala moko!) kino na esika ya búlee, azuelaki biso . . . (lobiko ya mpóso moko, lobiko kino na mayangani ya kolamuka oyo elandi? Ya ndenge nini?) . . . lisiko ya seko.

¹³⁵ Liloba oyo “Seko” elingi koloba nini? Kati na Klisto, nsima na ngai kondima . . . Moto moko te akoki kobenga Yesu “Klisto,” soki na nzela na Molimo Mosanto te. Na boye ezali na lolenge misato ya bato: bazangi kondima, bandimi ya maloba mpe bandimi. Kasi baoyo bandimi kino na Bomoi ya Seko, basili kokóta na kati ya mbalasaní.

¹³⁶ Bókamata mongombo ya kala, bazalaki liboso kosala nini? Bazalaki kokota na kati ya mbalasaní, Mabota. Oyo elandi ezalaki na etumbelo ya motáko, esika bazalaki kosukola mbeka na sáni ya wólo. Oyo elandi, ezalaki esika ya koboma mbeka,

mpe komwangisa makila likoló na etumbelo. Bongo, mbala moko na mobu, Aaron azalaki kopakolama, oh, (nini?) na malási ya folólo ya Rose ya Sarona, ná mafuta ya motuya mingi, oyo ezalaki na malási na kati na yango, bazalaki kosopa yango likoló ya motó na ye, ezalaki kokita kino na nsuka ya elamba na ye. Bótala malamumu ndenge mobali oyo asengelaki kokóta nsima ya baridó yango, mbala moko na mobu, kokumbáká liboso na ye makila mpo na Ebonga ya Mawa. Mpe amemaki lingenda na ye na kati, mobu moko, mpe abosanaki yango kuna. Ntango bazongaki mpo na kozua yango, esilaki kobimisa mwa bitape mpe ebotaki bafelele. Lingenda moko ya kala ekaúká oyo azalaki na yango ntango mosusu mibu pene na ntuku minei, na lisobe, ezalaki wana na Esika ya Bulee wana! Bótala malamumu, ntango bazalaki komema makila ya kondimana wana, makila yango, azalaki na epakweli. Mpe azalaki kolata bilamba oyo ezalaki na bangonga ya mike-mike, mbuma ya grenade ná ngéngélé. Mpe mobali yango asengelaki kotambola na lolenge moko boye, ete mbala nyonso oyo azalaki kopusa lokolo, kotambola *boye*, mpo na kobwaka litambe, ezalaki kolela “Santu, santu, santu epai na Yawe. Santu, santu, santu, epai na Yawe. Santu, santu, santu, epai na Yawe.” Oh la la!

¹³⁷ Nazali kolobela likambo nini? Bóyoka Yango, Branham Tabernacle! Bosili kozua libaku malamumu na bino. Ntango moto asili kopakolama na Molimo Mosanto, mpo na kotiamama lokumu na libota ya Nzambe, mpo na kotiamama na Tata na esika elongobani, mpo átiama na mosala awa, na ntina na ye na bomoi oyo, to na ntina oyo Nzambe asili kobéngela ye, kotambola na ye esengeli kozala “Santu, santu, santu, epai na Yawe. Santu, santu, santu!”

“Oh, osengeli kobaluka na ngambo *oyo* mpe kozala . . .”

“Santu, santu, santu, epai na Yawe.”

“Oh, osengeli kondima nyonso oyo mpaka alobaki, *oyo* boye.”

¹³⁸ Kasi: “Santu, santu, santu, epai na Yawe.” Tika ete Liloba na Ye ézua esika ya liboso, tika ete Ézala nyonso oyo ezali, ezinda, efándá mpenza kati na motema na yo! Kotambola na yo esengeli kozala kati na Liloba. “Santu, santu, santu, epai na Yawe.”

¹³⁹ “Oh, soki okolinga kaka koya awa! Nakoyebisa yo likambo nini tokosala, tokobongisa, tokokotisa yo na ebongiseli na biso, okokóma moto monene.”

¹⁴⁰ “Santu, santu, santu, epai na Yawe. Santu, santu, santu, epai na Yawe,” ozokoba kokende liboso, ezosala bokeseni moko te, oyo moto moko akoloba, akobenga ba-bande oyo.

¹⁴¹ “Sala *oyo*, sala *oyo*, sala *oyo wana*, sala *oyo wana*, oyo *mosusu*.”

142 “Santu, santu, santu, epai na Yawe.” Miso na yo ezali kotala kaka Kalvari, mpe eloko moko te ekopekisa yo! Etamboli mpenza ya bomoi na yo, ozali kotambola na Nzela monene ya Mokonzi, opakolami Mafuta mosanto ya motuya, ozali kokota na Esika eleki búlee. Fiuu! Amen. Malamu.

143 Polo alobaki ete azuaki Oyo epai na bato te. Sikoyo alobi nini, tózonga na Bagalatia, na liteya na biso? “Amonisi biso libombami ya mokano na Ye.” Mokano na Ye ezali nini? “Amonisi libombami ya mokano na Ye.” Bino baoyo bozali kokoma, ezali molongo ya 9. Sikoyo nakosala nokinoki mpenza, mpo ntango ebandi koleka.

144 Oh, Liloba moko na moko ezali mpenza Oh, Liloba moko na moko ezali libanga ya ntálo. Okoki kaka kozua Yango mpe kokoba kongengisa Yango. Okoki kotimola, nakoki . . . Okoki kozua Liloba moko kuna, omemi yango na Genèse mpe ongengisi yango, omemi yango na Esode mpe ongengisi yango lisusu, omemi yango na Balewi mpe ongengisi yango lisusu, mpe, ntango okómi na Emoniseli, Ekómi Yesu na eteni moko na moko! Amen. Okoki mpenza kongengisa yango ndenge olingi, ekokóma Yesu ntango okokóma—ntango okokóma na Emoniseli. Mpamba te, Alobaki: “Nazali Ye oyo Azalaki, Oyo Azali, mpe Oyo Azali koya. Nazali Mosisá mpe Mwana na Dawidi, Monzoto ya Ntongo. Nazali Alifa mpe Omega.” Elingi koloba A mpe Z na alphabet ya ki-Greki. “Nazali kobanda na A kino na Z. NAZALI! Nazali Nyonso-kati-na-nyonso.” Ya solo. “Nazali Ye oyo azalaki na bomoi mpe akufaki, mpe azali na bomoi mpo na libela. Nazali na bafungola ya liwa mpe ewelo.” Oh la la! Libanga ya ntálo nyonso oyo okozua awa mpe obandi kongengisa yango, ekongenga mpe ekotalisa Yesu.

145 Sikoyo, kaka mwa ntango moke lisusu, na nsima toko—toko—toko—toko, tokosilisa. Iyo. Bongo, tozali kozela nini? Ntina nini bozali awa, na liyangani oyo? Ntina na yango ezali nini? Mpo na nini mokili ezali kokimela? Mpo na nini bombe atomique ezodiembela likoló, kuna, ba-moléculé ná ba-atome ezali eloko nini? Mpe, oh, likambo yango nini?

146 Bózua Baroma, mokapo ya 8, miníti moke kaka. Ezali kozela nini? Nyonso oyo ezali kozela nini? Tokómi ntango nini? Baroma, mokapo ya 8, mpe tóbanda kotánga pene na, oh, nakoloba mokapo ya mwamb- . . . Tóbanda pembeni ya molongo ya zomi na lib- . . . ya 19, mpe tokotánga kaka—kaka wana mpo na kokómisa yango—kokómisa yango elengi mpenza. Ezali solo. Nayebi epai makanisi na bino ezali kokende. Malamu. Baroma, mokapo ya 8, nabanzi nazui yango sikoyo. Iyo, misie. Mokapo ya 8, mpe tóbanda awa, pembeni ya molongo ya 18. Tóbanda ata na molongo ya 14.

Mpo baoyo nyonso bakambami na molimo na Nzambe bazali . . . bana na Nzambe. (Ya solo.)

Mpo boyambi molimo na boombo te, ete bozonga na makambo na kobanga; . . .

147 “Oh, nazali komituna soki nakokoka. Oooh, soki nakokoka mpenza!” Kokoka eloko moko te! Ezali te soki nakokaki, ezali nde soki Ye akokaki. Nazali kati na Ye sikoyo, bomoni.

148 Ee, okoloba: “Ee, soki nazali kati na Ye!” Sikoyo, bino—bino ba-Presbiterien, bokoloba: “Ah, biso tondimaka Yango ntango nyonso.” Kasi bomoi na yo ezali kotalisa ete ezali bongo te, loba bobele soki obikeli lolenge ya bomoi oyo Ye abikelaki, soki ondimi Nsango-malamu moko oyo Ye ateyaki.

149 Okoloba: “Ah,” Mobatiste akoloba, “na ntembe te, nandimelaka kobatelama ya Seko.” Mpe okei kuna, mpe omeli ba-cigare mpe okei na bisika ya mabina, mpe basi bazali kokata suki na bango, kopakola-pakola, mpe kobika lokola soki nini? Bambuma na yo ezali kotalisa ete ondimi Yango te.

Soki nalobi: “Ondimaka lobiko na nzoto kouta na Nzambe?”

“Oh, Molakisi Jones alobaki ete ezalalaki *bongo*, wana ezalaki na mikolo ya kala.”

150 Sikoyo, yo moto na bilongi mibale! Likambo nini ná yo? Yo mwa mwana oyo ozomikosa. Ozali mpenza mosika na Nsango-malamu kino ezosala mpenza mawa. Omemami pembeni na nzela moko ya potopóto ya fúlu oyo ezozíkáká. Ozomona awa te oyo Ye alobaki? Ete, molimo nyonso oyo eyambolaka ete Yesu ayei na nzoto te, sika-sikoyo, euti na molimo mabe. Biblia elobi ete Yesu Klisto azali motindo moko lobi, lelo mpe libela. Oyo Alobaki na ntango wana, Azali bongo sikoyo, Azalaka ntango nyonso bongo. Bóyoka.

Mpo bosili koyamba molimo ya boombo te, ete bozonga na makambo na kobanga; kasi bosili koyamba Molimo ya lo- . . . [Losambo balobi: “Lokumu Ya Mwana.”—Mok.]

151 Sikoyo, nsima na yo kotiana lokumu ya mwana, malamumu, nsima na yo kotiana lokumu ya mwana. Otiami na esika na yo, na nsima ososoli, nsima na molúlú kolobama, mpe otiami kati na Nzoto na ndenge elongobani. Okómi mwana mobali, ya solo, mwana mwasi, ntango obotami mbala ya sika, ozali yango, wana ezali mbotama na yo. Kasi sikoyo otiami na esika na yo.

Biso tosili koyamba molimo ya . . . makambo na kobanga te; kasi biso tosili koyamba Molimo—bisu tozuaki Molimo ya lokumu na bana, na nzela na yango tobélelaka ete: Abba, Tata. (Elingi koloba “Nzambe na ngai”. Malamumu.)

Molimo yango moko atitolaka elongo na molimo na biso ete tozali—tozali bana na Nzambe:

152 Esalaka yango ndenge nini? Okoloba: “Nkembo na Nzambe! Aleluya! Etungisaka ngai te, nazali mwana na Nzambe,” mpe

obimi mpe obandi kosala makambo osalaka? Molimo ya Nzambe ekosala misala ya Nzambe.

153 Yesu alobaki: “Ye oyo akondimela Ngai, misala mizali Ngai kosala, ye mpe akosala yango.” Bomoni? Bomoni?

154 Soki—soki—soki—soki mobimbi oyo ebimi mpe eboti ebólo ya mbuma ya vinyo, kasi etape oyo eyei nsima na yango eboti ba-citrouille, mbeba moko ezali. Bomoni? Ezali lingomba oyo ekangisami, ezali mobimbi oyo ekangisami, ezali moto oyo babambi kobamba. Soki moto moko ya denomination, oyo asambelaka na denomination moko mpe amibengaka Moklisto, kasi azali na Molimo Mosanto te, mpe azali na Nguya ya Nzambe ná makambo nyonso wana . . .

155 Sikoyo, soki obimi awa mpe obandi kosala lokola bato oyo balángwi masanga, kaka mpo olobaki minoko na sika. Namóná milimo mabe koloba minoko na sika. Iyo misie. Namóná bango kobína na molimo, kogánga, mpe nsoi kobima na monoko, ná makambo mosusu nyonso, mpe nyonso wana. Namóná yango. Nazali. . . Nazali kolobela oyo wana te. Nazali kolobela nde Molimo ya Nzambe.

Molimo yango moko etatolaka elongo na molimo na biso ete tozali. . . bana na Nzambe:

Bongo soki tozali bana, basangoli na libula; basangoli na libula ya Nzambe, . . . basangoli ya libula elongo na Klisto; soki nde . . . tokoyokaka mpasi elongo na ye, ete tókoka mpe . . . kozua nkembo elongo na ye.

Mpo nabanzi ete mpasi. . .

156 Bóyoka naino oyo. Oh, ezali mpenza kitoko mingi!

Nabanzi ete mpasi na ntango oyo ekoki kopimama te na nkembo oyo ekomonisama kati na biso—kati na biso.

Jambi, na mposa monene, mokili. . .

157 Elobi awa, ezali na mwa—ezali na mwa liloba kuna, mwa nkoma na mopanzi, ete liloba oyo “bikelamo” nde esengeli, na ki-Greki.

. . . na bamposa monene ya bikelamo, bikelamo ezali kozela komonana ya bana na Nzambe.

158 Biloko nyonso ezali kozela nini? Bikelamo nyonso ezali kozela nini? Komonana ya bana na Nzambe. Ezali kozela ete Lingomba ézua esika na Yango. Nani azalaki mwana na Nzambe, ntango Adama, bokonzi na ye ezalaki wapi? Mabelé. Ye, ye azalaki na bokonzi likolo na mabelé. Ezali bongo? Azalaki Elah, Elah, Elohim te na ntango wana; Azalaki Jéhovah. Bomoni? Elingi koloba: “Nazali Nzambe, mpe Nasili kosala baoyo ya mike na nsé na Ngai. Mpe Napesi bango bokonzi. Mpe lopango na bango, oyo bazalaki na bokonzi likoló na yango, ezali mabelé.”

Moto azalaki na bokonzi likoló na mabelé. Mpe bikelamo nyonso mobimba ezali kozela ete bana na Nzambe bámonisama. Oh!

Tozali kozela boyei ya mokolo ya esengo ya
Millénium wana,
Ntango Nkolo na biso akoya kokamata Mwasi
na Ye ya libala, oyo azali kozela;
Oh, mabelé ezali kokimela, kobelela mpo ete
mokolo kitoko wana ékoka,
Ntango Mobikisi na biso akozonga lisusu na
mabelé.

¹⁵⁹ Ezali bongo? Kozela. Nzambe azali koluka kotia Lingomba na Ye na esika na yango, mpo na komimonisa Ye moko, kozua moko oyo Akoki kosalela na lolenge oyo, alobi: “Wana nde epai oyo Molimo na Ngai ezali kotambola na bonsomi. Wana nde Yango. Oyo, oyo, Na—Nakoki kosalela.” Tala, zua moto mosusu awa mpe tia ye na esika na ye: “Nakoki kotia ye na esika na ye.” Kotiama lokumu ya mwana, kotiama na esika, komonana, komema ye awa mpe kosalela ye molúlú, kotala ye ná Mwanje, koyebisa ye likambo moko. Sikoyo, soki alobi solo! Sikoyo, soki azali kaka komekola eloko moko, ekosimba te. Te, te, oyo wana—oyo wana ekosimba te, tomóná makambo mingi ya ndenge wana. Kasi nalingi koloba—kasi nalingi kolobela komonana ya bana na Nzambe, ntango Nzambe amitalisi polele Ye moko mpe Atindi ye. Na bongo, akei liboso, mpe oyo azali koloba ezali Solo. Oyo azali kosala ezali Solo. Oyo azali kosala, azali kotalisa Klisto. Bokoyeba ye ndenge nini? Na ndenge azali kokangama na Liloba, mpenza-mpenza na Liloba. Bomoni, ndenge wana nde bayebaka moto nyonso, na ndenge azali kokangama na Liloba. “Soki balobi kokokana na Liloba te, Bomoi ezali te kati na bango,” ndenge Biblia elobi. Bomoni? Bótika bango.

¹⁶⁰ Sikoyo tótánga, na nsima to—tokosengela kosukisa, mpo ntango na biso ekómi koleka. Malamu, molongo ya 10, to molongo ya 9, kútu.

Ayebisaki biso libombami ya mokano na ye, (ya kotia biso na lokumu ya bana) kokokana na mwango na ye oyo abongisaki kati na ye moko:

¹⁶¹ Abongisaki likambo oyo Ye moko, liboso na kozalisama ya mokili. Bato boni bazali kososola yango? Bomoni?

Ete na ntango oyo . . .

¹⁶² Oh la la, tala yango oyo lisusu! Ah! Oh, tó—tó—tóleka yango kaka, bomoni.

. . . na ntango oyo ngonga ekokoka . . .

¹⁶³ Bondimaka ba-ntango? Biblia nde elobi bongo: “Na ntango oyo ngonga ekokoka.” Kokoka ya ngonga ezali nini? Ezalaki na ntango moko ya, toloba, ezalaki na ntango moko ya Mobeko ya Mose. Ezalaki na ntango moko ya—ya—ya Yoane Mobatisi.

Ezalaki na ntango moko ya Klisto. Ezalaki na ntango moko ya lingomba kokóma ebongiseli. Ezalaki na ntango moko ya Molimo Mosanto kosopana. Sikoyo ekómi ntango ya kotياما lokumu ya bana, oyo mokili ezali kozela, kokimela. “Mpe ntango ngonga ekokoka, na ntango oyo ngonga ekokoka,” kokoka ya ngonga ezali nini? Ntango bakufi bakosekwa, ntango malali ekosila, ntango. . . ntango mabelé mobimba ekotika kokimela. “Ntango ngonga ekokoka.” Bótala malamú likambo oyo.

Na ntango *oyo ngonga ekokoka, ete ayanganisa biloko nyonso esika moko kati na Klisto, . . .*

¹⁶⁴ Epesi bino esengo te? Ndenge nini Akosala yango? Akoyanganisa biloko nyonso kati na Nani? [Losambo balobi: “Klisto.”—Mok.] Ndenge nini baketaka kati na Klisto? [“Na Molimo moko.”] Na Molimo moko, biso nyonso tobatisami kati na [“Nzoto moko”] Nzoto moko. Mpe Nzoto yango ezali Nzoto ya Nani? [“Ya Klisto.”] Esíli kosambisama. Amemaki kosambisama na biso. Na bongo, tokómi nini? “Ntango Nakomona [“Makila.”] Makila, Nakoleka likoló na bino.” Mbala nyonso Atalaka Nzoto yango, tala Yango wana, Efandi wana, Ezali kotanga Makila. Mpe ngai nazali kuna na kati, na nzela na nini? Na nzela na Molimo Mosanto. Aleki na likoló. Oh la la!

Mpe na ntango oyo ngonga ekokoka, *ete ayanganisa biloko nyonso. . . esika moko kati na Klisto, oyo ezali na likoló mpe, . . .*

¹⁶⁵ Sikoyo soki bolingi kolobela nkombo moko, tokobanda yango kaka sikoyo mpo na ngonga moke. Libota mobimba na Likoló ebengami na nkombo nini? [Losambo balobi: “Yesu Klisto.”—Mok.] Libota mobimba na nsé ebengami na nkombo nini? [“Yesu Klisto.”]

¹⁶⁶ Basi malamú bazali awa, ya malamú, ya motuya, madame, ba-madame ya solosolo. Madame Branham azali kaka moko, Mme William Branham, azali mwasi na ngai. Ye nde azongaka na ndako elongo ná ngai. Bomoni, bino baoyo botikali, bozongaka elongo ná mibali na bino.

¹⁶⁷ Lingomba monene ya bomoi, ya Nzambe na bomoi, ezalaka kaka moko, Ye nde azali na Nkombo na Ye, Atondisami na Molimo na Ye. Ya solo. Nalobi te. . .

¹⁶⁸ Nazokweisa misala malamú te, nazokweisa balopitalo na bango ná makambo ya malamú oyo basalaka te. Nakanisi ete ezali na yango malamú mpenza, mpe mapamboli ya Nzambe mpo na mokili ya bato bazali komona mpasi oyo. Nazokweisa makambo mosusu nyonso oyo bazosala te. Malamú mingi, ezali na yango malamú. Mpe bibongiseli na bango ya minene, ná ba-million ya ba-dollar, nakosepela kutu komona oyo wana, na esika ya komona banganda ya lotoko na nsuka ya balabala, ntango nyonso. Na ntembe te, napesaka bango lokumu, lokola batei oyo batelemaka na eteyelo.

169 Kasi na oyo etali koyanganisa elongo biloko nyonso na nsuka ya ntango, ekozela komonana ya bana na Nzambe, na ntango wan- . . . ntango Akoyanganisa nyonso esika moko, nyonso oyo ekokotisama kati na Klisto. Klisto azali nini? Bato boni. . . Ndenge nini tokotaka kati na Ye? Bakorinti ya Liboso 12: “Na Molimo moko, biso nyonso tobatisami kati na Nzoto moko,” elingi koloba Nzoto ya Klisto, mpe tozui libula ya makabo nyonso mpe biloko malamumu nyonso oyo Azali na yango. Boye te? “Mpe mabelé mobimba ezali kokimela, kolela, kozela komonana, ntango Klisto ná Lingomba na Ye bakosangana elongo.”

Mpo . . . ntango oyo ngonga ekokoka . . . akoyanganisa . . . nyonso esika moko kati na Klisto, biloko oyo ezali na likoló mpe oyo ezali na mabelé; mpe kati na ye: . . . mabelé; kati na ye:

Kati na ye tokómi . . . bazui ya libula, . . .

170 Oh, Ndeko Neville, limbisa ngai ndenge nazui ntango nyonso oyo. Ngai . . . liliba wana “libula”. Oh-oh-oh-oh! Oh, esengeli kozala! Oh-oh-oh-oh! Nayebi ete Ye . . . Azali Ndeko na libota na ngai. Ezali te . . . Nazolikya ete nabeli liboma te. Na—na—na . . . Nabanzi te. Kasi, oh la la! Nini? “Libula.” Tosili kozua libula. Moto moko asengeli kotikela yo eloko moko. Nzambe, liboso na kozalisama ya mokili, atikelaki yo eloko moko. Nkombo oyo ekomámá na Buku, ete ntango bakoboma Mwana-mpate, yo ókkanisama elongo ná Yango. Oh! Tóbomba yango mpo na mpokwa oyo. Tókoba kotánga mwa moke. Oh la la, Oh la la! Ndene nini tokokóma na molongo ya 3 na mpokwa ya lelo, to na mokapo ya 3? Toyekoli ata milongo minei to mitano te, ya mokapo oyo. Kasi ata bongo, tolingi kosilisa, ekosengela nátánga kaka, mpe náleka.

Kati na ye tosili kozua libula, ndenge . . .

171 Nini? Ndenge nini tozuaka libula yango? Ndenge nini tozuaki yango? Mpo totambolaki malamumu? Ndenge nini tozuaka libula oyo? Mpo tosilá kobongisama liboso. Amen. Fiuu! Bandede na ngai ba-Arminien, nayebi ete ezali mpenza matata. Nakani kosala moto mpasi te, kasi ezali kosepelisa ngai mpenza, koyeba ete yango . . . O—o—ozali na likambo yango, ozali na likambo yango, ndeko, malamumu. Ozali kaka nde komona yango te. Ata bongo, bozali na likambo yango moko. Bomoni? Ozali na yo na likambo te, bomoni, bozali na bino na likambo te. Bomoni? Kasi, oh, kasi ezali kitoko mpenza kotala yango. Iyo. Kaka lokola likambo oyo Ndeko Neville alobaki na oyo etali galerie, lobi: “Luka ebuteli mpe tambola mpo ómona biloko oyo ozali na yango.” Iyo, misie. Wana nde oyo likambo Oyo ezali. Molimo Mosanto ya Nzambe ezali ebuteli na biso, mpo na koyebisa biso biloko oyo tozali na yango. Bomoni?

172 Bomoni, libula. Oh la la! “Ndenge . . .” Libula ya ndenge nini?

...ndenge tobongisamaki liboso kokokana na mokano ya ye oyo azali kosala makambo nyonso ndenge mokano na ye elakisi:

¹⁷³ Ntango Azalaki. . . liboso Ázala Papa, liboso Ázala Nzambe, liboso Ázala Mobikisi, liboso Ázala Mobikisi ya bokono, liboso na nyonso oyo, Ye abongisaki liboso, atiaki Nkombo ya Mwana-mpate na Buku, abwakaki miso na ntango, na boyebi na Ye makambo liboso, mpe amonaki nkombo na yo, atiaki yango mpe kuna. Ezali nini? Mpe nsima na mwa ntango, toyaki na mokili, tobotamaki na baboti basumuki; totambolaka na mokili, boyebi. Na mbala moko, lokola Moyuda wana ná zolo egumbáma, Polo, boyebi, mpe—mpe azalaki kosala mosala na ye, mpe, na mbala moko, Eloko moko elobaki: “Tala, tala, tala, tala, tala!”

Okoloba: “Oh, Abba, Tata!”

¹⁷⁴ Awa tobandaki koya, bomoni. Abongisaki biso liboso mpo, kati na Ye, tózua libula na biso, oyo ebongisamaki liboso mpo na biso. Bomoni, tozuaki libula yango liboso na kozalisama ya mokili. Bomoni? Oh! Kokokana na mokano na Ye moko, mpo na kokokisa mokano malamau na Ye moko, yango mpenza, ya kozala Nzambe mpe Mobikisi.

Bino mpe botiaki elikia epai na ye, sima na bino koyoka liloba ya solo oyo, . . .

¹⁷⁵ Mpe Nani azali Solo? Yesu azali Solo, Solo ya Nsango-malamau. Nsango-malamau nini? Nsango-malamau ezali kaka moko. Bagalatia 1, elobi: “Ata soki Mwanje moko ateri nsango-malamau mosusu, tika ete álakelama mabe.” Oyo nde Nsango-malamau, Nsango-malamau ya lobiko na bino; mosusu te, mosusu ezali te. “Nkombo mosusu ezali te—ezali te, oyo epesami na nsé ya Lola, oyo bosengeli kobika na nzela na yango.” Kasi na Nkombo nini? [Losambo balobi: “Ya Nkolo Yesu Klisto.”—Mok.] Oh la la!

... epai na ye. . . nsima na bino kondima, bino bosilaki kotiama elembo. . .

¹⁷⁶ Oh, “Nsima na bino kondima!” Ndenge nini tokoki koleka yango noki-noki, ndeko? Tótika yango mpo na mpokwa oyo, bolobi nini? Oh la la! Na—nakoki kokende mosika—mosika koleka wana te. Tótika yango mpo na mpokwa oyo. Nazokoka kotika te liloba wana “kotiama elembo,” ndenge oyo bakotaka kuna, bomoni.

¹⁷⁷ Libula na nzela na kobongisama liboso. Nazuaki libula ya eloko moko. Libula nini? Esengelaki kozala na moto oyo asengelaki kotikela ngai libula. Ee, okoloba: “Yesu atikelaki yo libula.” Tika na yo kaka! Yesu atikálá kotikela ngai libula te, Yesu atikálá kotikela yo libula te; Ayaki na nsé kaka mpo na kofuta ntalo ya libula na yo, amemaki yo na libula na yo. Kasi nkombo na yo etiamaki na Buku ya Bomoi ya Mwana-mpate liboso na kozalisama ya mokili. Nzambe apesaki yo libula na

yo. Libula na yo ezalaki liboso. Yesu ayaki bobele. . . Bato mingi, bótala ndenge bamekaka kolimbola yango: “Nzambe alobi: ‘Ee, bato mingi babungi. Ata moko te kati na bango akobikisama, boye Nakotinda Yesu na nse, mpe ntango mosusu Ye ako. . . moto moko akoyoka mawa, mpe akoyeba likambo oyo Nasali mpe akobikisama.’” Oh, mawa! Nakolinga kotambwisa makambo na ngai ndenge wana te, ata kutu mbala mosusu natambwisaka yango mabe mpenza. Bomoni? Na—nakolinga kosala bongo te. Bongo Nzambe kasi?

¹⁷⁸ Nzambe, na boyebi na Ye makambo liboso, amonaki mpenza nani akobikisama mpe nani akobikisama te, Atindaki Yesu mpo na kobikisa baoyo Asilaki kopona. Polo alobaki te, milongo mitano nsima na oyo, ete “Aponaki biso kati na Ye liboso kútu mokili ézala”? Yango nde libula na biso. Nzambe aponaki biso, mpe atindaki Yesu mpo áya kofuta ntalo. Ete nini? Makila na Ye ésopana, mpo lisumu moko te étángamela biso. Ezali eloko oyo yo osali te. Kasi soki o. . .

¹⁷⁹ “Moto oyo akosala lisumu na nko, nsima na kozua boyebi ya Solo, mbeka ezali lisusu te.”

¹⁸⁰ Sikoyo, mpe wana nde esika oyo bokotelema lisusu mpo na koloba: “Olobi nini mpo na yango, Ndeko Branham?”

¹⁸¹ Kasi bómikanisela kaka, bomoni, “baoyo basili kozua *boyebi* ya Solo.” Batikalá kozua Solo te, bazuaki kaka boyebi na Yango. Bomoni? Ekoki kosalema te ete baoyo basilaki kongengisama mpe kozala basangoli ya Molimo Mosanto, komeka elengi ya nguya ya Liloba kitoko. Lokola bandimi ya ndelo wana, kuna. Bato mingi bakomeli ngai mikanda likoló na yango.

¹⁸² Bandimi ya ndelo wana bakómaki kino kuna, Yosua ná Kalebe bakendeki kino na ngambo kuna. Mpo na nini? Sikoyo, tokobenga yango Molimo Mosanto, mboka wana. Bango oyo na esika oyo *awa*. To *awa*, tóloba, *oyo* nde Molimo Mosanto, mpe bango bazali *kuna*, bomoni. kuna nde esika elaka ezali, ezali *kuna*. “‘Ee, soki batindaki banóngi zomi kuna, moko longwa na libota moko na moko, mpo biso nyonso, mabota, tókoka koyeba libula na biso ezali nini, koyeba bisika bango nyonso bakotiana kuna, bisika tokotiana.’ Boye nakotinda banóngi kuna.”

¹⁸³ Bango nyonso bakómaki kuna: “Oh la la! Te. Bakobenga biso batúntuki, kobanda na ntango wana. Te, te-te, tokokoka te.” Bomoni?

¹⁸⁴ Yosua ná Kalebe balobaki: “Nakotala soki ezali ndenge nini.” Boye bayaki na ngámbo oyo, mpe batambwisaki miso bipai na bipai. Oh, basembolaki maboko, mpe babukaki ebólo monene ya mbuma ya vínyo ya kuna mpe bazongaki. Balobaki: “Ndeko, ezali kitoko, ezali mpenza kitoko! Tala, zua ndambo ya mbuma yango, ezali mpenza elengi!”

¹⁸⁵ “Oh, ezali kitoko, kasi, oh, bótala bingambe wana. . . Oh, tokokoka te. Kotelemela ba-denomination minene nyonso wana,

biloko minene nyonso wana? Oh, ezali mawa mingi, tokokoka kosala yango te. Te, misie! Ata nani, tokokoka te. Te misie.” Mpe babandaki koloba: “Oh, tózonga na biso na bisengo na Ezipito. Elingaki kozala malamumu soki totikalaki na biso kuna. Tokokoka kosala yango te, nzela oyo ezali nkaká mingi. Toyebi ete tokokoka kosala likambo *oyo* te, tokokoka kosala likambo *wana* te.”

¹⁸⁶ Mobange Kalebe alobaki: “Bófanda kimia, bino nyonso!” Yosua alobaki: “Bókanga minoko, bino nyonso! Bótika ngai náloba likambo moko.”

¹⁸⁷ “Oh, mawa, mawa, mawa, tokokoka kosala yango te! Oh, tokokoka te. Kasi, soki esengeli nátika masano ya kalati, Ndeko Branham! Soki esengeli nátika suki na ngai ékóla lokola mobange mwasi moko boye, nayebi mpenza te nini nakosala. Soki esengeli nálongola mwa bakupé na ngai, na—na—na, oh, nakokoka na ngai te, oyebi. Mpe, soki ekosengela nátika bacigare na ngai, soki esengelaki násala bongo!” Ozali mpenza ndakisa moko ya mabe. Iyo. “Nakokoka kosala yango te.”

¹⁸⁸ Yosua alobaki: “Oh, ezali kitoko. Aleluya! Tokoki kozua yango.” Ezalaki nini? Bango bazalaki kotala bingumba minene oyo ezingamaki na bitutu ya milai. Kasi Yosua ná Kalebe bazalaki kotala elaka oyo Nzambe apesaki. Kangama na Liloba, etali te nani yo ozali. Kangama na Liloba!

¹⁸⁹ Mpo Petelo alobaki: “Bóbongola mitema, moko moko na bino, mpe bóbatisama na Nkombo na Yesu Klisto, mpo na bolimbisi ya masumu na bino, mpo elaka yango ezali mpo na bino,” (Mboka nini ya elaka?) “mpe epai na bana na bino, mpe mpo na baoyo bazali mosika, ata baoyo nyonso oyo Nkolo Nzambe na biso akobenga.”

¹⁹⁰ Bótika te ete likambo oyo ésala bino mpasi, mpo na kosilisa, nasengi na bino. Bomoni? Bino ba-Pèlerin de la sainteté ná ba-Nazaréen kuna, boyaki mpenza na kobulisama, botambolaki mpenza awa téé na esika oyo bokómaki ata komona bambuma ya vinyo yango, bongo na nsima, bobalukaki mpe bozongaki. Bomoni likambo oyo esalemaki? Yango nde likambo, botikalá kokende kino na ngambo kuna na kati ya mboka te. Bólakisa ngai Nazaréen to Pèlerin de la sainteté moko mpamba, to moko na baoyo bazali kosala mosala lelo, kosaláká mayangani minene ya kobondela mpo na babeli ná bilembo mpe bikamwa kosalema. Bólakisa ngai moko mpamba. Bofandaki malamumu na Ezipito, bozongelaki bilubu ya áyi. Bosukaki na Kades-Barnea. Ya solo.

¹⁹¹ Bótala malamumu, mpe bótika natalisa bino esika bozali, na Baebele, mokapo ya 6. “Mpo ekoki kosalema te mpo na baoyo basilaki kongengisama,” boyebaki malamumu koleka. Soki boyebaki yango te, boyebi yango sikoyo. Bomoni? “Mpe basilaki kozua libula, mpe komeka elengi ya makabo ya Likoló.”

¹⁹² Bamekaki elengi, bomoni. Bato bakendeke na losambo, bafandaka mpe balobaka: “Boyebi, bango—bango bakoki kozala

na elónge. Yango—yango—yango ekoki kozala bongo. Ekoki mpenza kozala bongo, kasi nalobi na bino, moninga, kosala yango, ekosenga kozala na kondima ebele.”

¹⁹³ “Komeka elengi ya makabo ya Likoló, mpe bomoni Makila ya kondimana ‘eloko mpamba,’ oyo bino bobulisamaki na yango.”

¹⁹⁴ Ndakisa motei, mama na ye atindi ye. Ye alobi: “Nayoki mbela ya kozala mosali ya Nkolo.”

¹⁹⁵ “Malamu. Likambo ya liboso nasengeli kosala ezali kosukola bilamba, cheri, mpe nakotinda yo na kelasi moko boye.” Wana ezali likambo ya mabe koleka nyonso oyo atikálá kosala. Ya solo. Bakolongola ye nyonso oyo Nzambe azali komeka kotia kati na ye. Na nsima, sikoyo bótala malamau.

¹⁹⁶ “Mpo soki tokosalaka masumu na nko, tosali masumu na nko, nsima na biso kozua boyebi ya Solo, boyebi. Komona yango na Makomi mpe koyeba ete Biblia elobi ete Azali ndenge moko lobi, lelo mpe libela. Komona Yango, ezali boyebi ya Solo. Komona yango, tobaluki, mpe tomoni mpamba Makila ya kondimana. . . .”

¹⁹⁷ Moto oyo alobi: “Oh, iyo, na—nandimeli Nzambe.” Malamau, otii litambe ya liboso.

¹⁹⁸ “Na ntembe te, nandimaka kobulisama.” Malamau, okómi na mondelo, okómi mpenza awa, obelemi mpo na kozua Molimo Mosanto. Kasi obwaki miso mpe olobi: “Na—na—nayebi mpenza te mpo na oyo wana. Soki nasengeli kobika lokola. . . Te. Nayebi te. Oyebi ndenge babengaka bato yango? Ah—ha, nayebi te soki nakokoka kosala oyo wana to te. Te, nabanzi nakokóba na ngai kaka mpe nakokóta. . . ? . . .” Bomoni? Bomoni?

¹⁹⁹ Mpe boyebi eloko nini ekosalema? Alobaki: “Ekoki kosalema te ete bákota kuna.” Basili kosumuka mpe kotiola mokolo na bango ya ngolu. Biblia elobi bongo. Nayebi ete ezali makasi, kasi Biblia elobi: “Bamekaki elengi ya makabo ya Likoló, mpe bamonaki mpamba Makila ya kondimana, oyo. . . .”

²⁰⁰ Balobaka: “Nandimaka kobulisama, bomoi malamau, ya mpeto mpe ya bule.”

²⁰¹ Na ntembe te, kasi yo, omonaki libatizi ya Molimo Mosanto, libatizi ná makambo mosusu nyonso oyo ezali na Biblia, kasi osalaki nini? Omonaki Makila ya kondimana, oyo obulisamaki na yango, “eloko mpamba.” Eloko nini mpenza ematisaki yo kuna, mobali? Eloko nini. . . ? . . . Eloko nini ebateli yo na kokóma mosumuki ya mbindo? Eloko nini elongolaki lisumu na bomoi na yo, komela makaya ná komela masanga, mpe basi ná biloko mosusu, na bomoi na yo, oyo esengelaki kozala wana te? Eloko nini esalaki yango? Makila ya kondimana! Bongo opusanaki pembeni mpenza mpo na komeka elengi ya mbuma ya vinyo ya Mboka mosusu, kasi oyokisi Nsango-malamau nsoni, obangi

denomination na bino! Nzambe áyokela yo mawa! Iyo, misie. “Omoni Makila ya kondimana ‘eloko mpamba,’ mpe otioli misala ya ngolu. Ekoki kosalema te ete átikala kokóta na Mboka yango.”

²⁰² Likambo nini esalemaki? Nazali kotuna bino. Sikoyo, ngai nazali typologue, mpe moto nyonso oyo ayebi Biblia azali typologue. Moko kati na bato yango atikalá kokóma na mboka ya elaka wana? Moko na bango te. Banani basalaki yango, banani bakendeki ngámbo kuna? Baoyo bakendeki liboso, bazongaki mpe balobaki: “Tokoki kozua yango, tokoki kozua Molimo Mosanto, mpamba te Nzambe alobaki bongo! Petelo alobaki, na Mokolo ya Pantekote, ete soki ‘nabongoli motema mpe nabatisami na Nkombo na Yesu Klisto,’ nasengeli kozua Molimo Mosanto, ete elaka yango ezali mpo na ngai. Nabelemi kosala yango. Ya ngai, elaka yango ezali ya ngai.” Bososoli? “Sikoyo elaka yango ekómi ya ngai. Nazui yango, ekómi ya ngai. Na ntembe te.” Ezalaki kaka bango moko.

²⁰³ “Oh,” okoloba, “kasi, Ndeko Branham, na lisekwa!” Bango bakozala kuna te. “Oh, bakozala te?” Te, misie. Yesu moto alobaki bongo.

²⁰⁴ Balobaki: “Pe Ozali komikómisa Yo moko monene lokola Mose, mpe Olobaki ete Yo ozalaki, ete Yo ‘omonaki Abraham.” Mpe alobaki: “Kasi—kasi—kasi—kasi Abraham asilá kokufa! Ee, Oleki te—Oleki naino mibu ntuku mitano te, kasi Olobi ete Omonaki Abraham?”

²⁰⁵ Alobaki: “Liboso Abraham ázala, NGAI NAZALI.” Oh la la! “NGAI NAZALI,” Nzambe oyo azalaka ntango nyonso, ya Seko. Lobi eleki te, lobi ekoya te, “NGAI NAZALI”. Bomoni? Nzambe oyo azalaka ntango nyonso, Elohim, “NGAI NAZALI”. Na bongo, balokotaki . . . Balingaki koboma Ye, na ntango yango.

²⁰⁶ Alobaki: “Ee, batata na biso baliaki mána na lisobe na mibu ntuku minei. Nzambe akitisaki mápa uta na Likoló, lokola mbula, mpe aleisaki bango. Bazalaki kosambela mpe bazalaki bandimi malamumu ya lingomba na mibu ntuku minei. Mobange ya mama na ngai akufaki na lingomba oyo mpenza,” mpe makambo nyonso ya ndenge wana. “Batata na ngai baliaki mána na lisobe na mibu ntuku minei.”

²⁰⁷ Mpe Yesu alobaki: “Mpe basila kokufa moko moko.” *Kokufa* elingi koloba “bokabwani ya Seko.” “Basilá kokufa moko moko. Kasi Ngai nalobi na bino ete Nazali Lipa ya Bomoio oyo euti na Nzambe, uta na Likoló. Soki moto alei Lipa ya Molimo oyo, azui Bomoio ya Seko, mpe akoki kokufa te. Mpe Nakosekwisa ye na mokolo ya nsuka.” Oh, ndeko, Azali malamumu mingi, boye te?

Azali malamumu, malamumu, malamumu, boye te?
Yesu, Nkolo na biso azali malamumu, boye te?

Miso emoni, matoi eyoki, oyo ekomami na
Liloba na Nzambe;
Yesu, Nkolo na biso azali malamumu, boye te?

²⁰⁸ Ezali ya solo? Tozali komona Molimo na Ye ya lisosoli kotambola katikati na biso. Tozali komona Ye kosala bikamwa, bilembo mpe makambo ya minene. Tozali koyoka Yango ndenge ekomami na Liloba awa, bozali komona Yango kotatolama kuna. Oh! la la!

Miso emoni, matoi eyoki, oyo ekomami na
Liloba na Nzambe;
Yesu, Nkolo na biso azali malamumu, boye te?

²⁰⁹ Na miníti mibale to misato, mosala ya kobatisa bato na mai ekosalema awa. mpe sikoyo, baoyo bakobatisama, basi bákende na ngámbo *oyo*, mpe mibali na ngámbo *oyo*. Sikoyo, mibali na loboko na ngai ya mwasi, *awa*, na ngámbo *oyo*. Mpe basi *awa*. Bokokuta bandeko basi kuna, basili kobongisa bilamba. Mpe soki mobali to mwasi moko azali awa na ntongo *oyo*, ondimisami ete ondimi Liloba na Nzambe, mpe ondimi ete Nzambe azali kokokisa elaka na Ye, oyo elobi ete soki moto ayamboli mpenza masumu na ye nyonso. . . Sikoyo, Makila esali naino likambo moko te. Te, ezali kaka kondima na yo epai ya Nzambe. Mpe Nzambe azali kobenga, kosala: “Fuu, fuu, fuu!” kobenga yo, yango nde ezali kosalema sikoyo, “Fuu, fuu!”

“Natikálá kobatisama te.”

“Fiuu, fiuu!”

“Ee, ee, soki nakoki kaka kobanda mpe kobika ndenge mosusu.”

“Fuu!” Yango, yango nde likambo, banda, bongo—bongo nde okosala makambo ndenge mosusu, nsima na yo kobanda. Bomoni? Osengeli kobaluka, kobanda, bomoni.

Okoloba: “Ee, na—na—natikálá komona yango ndenge wana te.”

²¹⁰ Ee, ndeko molingami, nalingi ete ólakisa ngai Likomi moko mpamba, epai wapi moto moko. . . Naséngá likambo oyo na mibu ntuku misato na moko ya lotomo na ngai, na mokili mobimba, liboso ya ba-évêque mpe bongo na bongo, epai oyo moto moko, moto moko atikálá kobatisama ndenge mosusu, libanda na Nkombo na Yesu Klisto. Mpe bato nyonso oyo babatisamaki na Nkombo na Yesu te, basengelaki koya kobatisama lisusu na Nkombo yango.

²¹¹ Nzambe azalaki kaka na Nkombo moko, mpe Nkombo na Ye ezali Yesu. Oyo wana ezalaki Mwana na Ye, Azuaki Nkombo ya Mwana na Ye. Nzambe! Sikoyo, Yesu, nzoto ezalaki moto. Toyebi yango. Oyo wana ezalaki Mwana na Nzambe, oyo azipamaki na elíngi. Sikoyo, tondimaka lolenge ya bomoko te, oyo bato balobaka ete Nzambe azali lokola mosapi na yo. Tondimaka

ete mis- . . . misala ya Nzambe ezali misato. Misala misato ya Nzambe, oyo Nzambe amitalisaka na yango. Kasi Nzambe azali kaka moko. Bomoni? Ya solo. Tondimaka te. . . Tondimaka na—na. . . Tika náloba yango boye, tondimaka ete Nzambe azalaki kobika na misala misato. Azalaki na mosala moko na mokili, na ntango moko.

²¹² Sikoyo, bino basi bókende na ngámbo *oyo*, mpe bino mibali bókende na ngámbo *oyo*, baoyo bazali komilengela. Bazali komilengela mpo na mosala ya libatisi sikoyo.

²¹³ Pe, sikoyo, Nzambe azalaki na misala misato. Moko na yango ebengamaki Botata, to ntango ya Tata; mosusu ebengamaki Bomwana; mpe mosusu ebengamaki Molimo Mosanto. Sikoyo, lelo, Tata azali kosala na—na ntango nini lelo? [Losambo balobi: “Molimo Mosanto.”—Mok.] Molimo Mosanto. Nini Ye azalaki na mikolo oyo elekaki? [“Yesu.”] Yesu. Nini Ye azalaki na mikolo oyo liboso na yango? [“Tata.”] Kasi ezalaki kaka Nzambe moko! Ezali solo? Azali Tata, Mwana mpe Molimo Mosanto, misato wana, misala misato wana nde misala ya Nzambe moko. Nzambe moko!

²¹⁴ Kasi, *Tata* ezali nkombo te, boye te? Nalingi kotuna bino. Sikoyo nalingi kopesa bino Matai 28:19, epai oyo Yesu alobaki: “Boye, bókende kokómisa bato bayekoli na bikólo nyonso, bóbatisa bango na Nkombo,” (N-k-o-m-b-o), “Nkombo ya Tata . . .”

²¹⁵ Sikoyo nalingi komona soki boyebi Likomi na bino malamau. Bóyebisa ngai, soki nabimi libanda na molongo. Mpe Alobaki na bango: “Bókende na mokili mobimba, bótéya Nsango-malamau na bikelamo nyonso. Ye oyo akondima mpe akobatisama akobikisama. Ye oyo akondima te akokweisama. Bilembo oyo ekolanda baoyo bakondima. Na Nkombo na Ngai, bakobengana milimo mabe,” Nyonso wana ezali solo? “bakoloba minoko na sika, bakolokota banyoka.” Sikoyo nakotángela bino, Matai . . .

²¹⁶ Sikoyo bóyoka. Nasengi na historien nyonso. Sikoyo maloba oyo ezali kotiama na ba-bande, ekendeke na mokili mobimba. Nasengi na historien nyonso ete áya kokutana na ngai mpe ámemela ngai maloba moko ya Likomi, maloba moko ya . . . to ya Likomi te, maloba moko ya Likomi to ya histoire moko, eteni moko ya histoire, oyo etikálá kotalisa ete Protestant moko, ete moto moko atikálá kobatisa na nkombo ya “Tata, Mwana, Molimo Mosanto” kino lingomba Katoliko ébimisa mobeko yango na Likita ya Nicée. Sikoyo, yango ezali na ba-bande, ekendeke na mokili mobimba, ezali kolimbolama na minoko ntuku misato na nsambo oyo ekeseni. Nakofutela yo tiké soki esengi ókatisa mbu. Ya solo. “Tata, Mwana mpe Molimo Mosanto” ezali eyambweli ya lokuta, ya moniato ya ba-Katoliko, ezali libatisi ya Baklisto te. Ya solo! Luther azuaki yango na lingomba Katoliko, ná katekisimo, Wesley mpe azuaki

yango mpe ekobaki. Kasi oyo ezali mokolo ya komonana ya bana ya Nzambe, ntango mabombami oyo ebombamaki uta na kozalisama ya mokili esengeli koyebana. Oyo nde ngonga yango. Ya solo mpenza.

²¹⁷ Bómikanisela, ata moto moko te na Biblia abátísámá na nkombo ya “Tata, Mwana, Molimo Mosanto”. Na mibu nkama misato, nsima na liwa ya ntóma ya suka, moto moko te atikálá kobatisama na nkombo ya “Tata, Mwana, Molimo Mosanto.” Bazalaki na... Natángá babúku ya *Batata Liboso Ya Nicée, Likita Ya Nicée*, uta na yango nde babongisaki oyo babengaka “lingomba ya Baklisto ya mokili mobimba,” mpe basalaki ebongiseli uta na yango mpe bakotisaki yango na makasi epai ya bato nyonso, yango nde ezalaki lingomba Katoliko. Liloba mpenza oyo *katoliko* elingi koloba “ya mokili mobimba,” lingomba ya Baklisto ya mokili mobimba, na mokili mobimba, lingomba moko, mpo na mokili mobimba. Mpe ki-Boklisto oyo, bazali kokotisa bato na makasi. Na kati na yango nde bazuaki, balongolaki Venus mpe batiaki Maria. Balongolaki Polo... to Jupiter, mpe batiaki Polo. Ezali kaka bopakano! Ya solo. Lingomba Katoliko eutaki nde kuna, mpe nsima na mibu nkama mitano...

²¹⁸ Bazali kolakisa filme moko na Louisville mikolo oyo, ya *Ben Hur*. Bautaki kolakisa oyo ya *Mibeko Zomi*, kala mingi te. Nalingaki kosepela ete básala oyo ya, soki ekoki kosalema, oyo ya mibu nkóto na nkama mitano ya eleko ya molili. Nalingaki kosepela ete básala oyo wana. Mibu nkóto na nkama mitano ya minyóko na bapakano, ntango bazalaki kokotisa bato nyonso mpe koboma bango, koboma bango, kotia bango singa na kingo. Bazalaki kokanga ngombe moko na loboko moko mpe ngombe moko na loboko mosusu, mpe bazalaki kotinda bango ete bápwepwa mwa ekulusu, soki te, bazalaki kotambwisa ngombe moko na ngámbo moko to mosusu. Na Suisse, natiaki loboko na ngai, na nsima ya makonzi, epai bazalaki kotia bango mpo na kokata bango lolemo, mpe kobenga bango bandoki mpe nyonso wana. Ezali mpenza ya solo. Ya solo!

²¹⁹ Mpe molimo yango ezali kino lelo oyo. Kaka mobeko nde ezali naino kokanga yango. Bózela ntango ekozua bonsomi. Biblia nde elobi bongo. Bózela ntango ekolakisa lolenge na yango, ntango ekozua libaku yango. Ekoki kosalema ete bóvote yango, kala mingi te, na nyonso oyo ngai nayebi. Bomoni? Ekosalema, ekoya. Makoki ya kopekisa yango ezali te. Esengeli koya. Ya solo. Esengeli koya, ezali koya. Na bongo, ntango ekoya, bósala keba. Kasi, ndeko, osengeli koyeba likambo moko oyo, nayebi Nani ngai nandimeli. Aleluya! Tozali kokoba kokende liboso. Bomoni. Ezali bongo.

²²⁰ Mokolo moko, ntango—ntango mokomi oyo, ntango nayebisaki mokomi ya Biblia ya Lam-... Lamsa—Lamsa, ntango atalaki mpe amonaki elembo ya kala oyo ya Nzambe, ezali

yango, yango mpenza, matóno misato ya mike na kati na yango, nalobaki: “Oyo wana ezali nini?”

Alobaki: “Ezali Nzambe na misala misato.”

Nalobaki: “Lokola Tata, Mwana mpe Molimo Mosanto?”

Atalaki ngai. Alobaki: “Ondimaka yango?”

Mpe nalobaki: “Iyo, misie.”

²²¹ Alobaki: “Ntango namonaki lisosoli ya makanisi na mpokwa wana, namilobelaki ete ozali mosakoli ya Nkolo.” Alobaki: “Nzambe ápambola motema na yo.” Azingaki ngai na loboko na ye, alobaki: “Sikoyo nayebi ete ezali bongo.” Alobaki: “Ba-Américain oyo bayebi te ata oyo.” Alobaki: “Bayebi ata eloko moko te.” Alobaki: “Bazali koluka kozua Buku ya Esti mpo na kokómisa Yango Buku ya Westi. Bayebi ata Biblia te.” Alobaki: “Nkombo mosusu ezali te, oyo epesami na nsé ya Lola, Nkombo mosusu te, mpo bato nyonso batikálá kobatisama na Nkombo na Yesu Klisto. Eloko moko lokola bato misato kati na Nzambe moko, ezalaka te.” Mpe ezali Ndeko Lamsa, Docteur Lamsa, molimboli ya Biblia Lamsa, oyo azali moninga ya motema ya Eisenhower ná ba-diplomate minene nyonso ya mokili mobimba, mpe nyonso wana, abwakaki maboko na ye koyamba ngai, alobaki: “Mokolo moko bakobeta yo masasi mpo na yango. Kasi,” alobaki, “kobosana te, bato nyonso wana bakufaka na ntina moko.”

²²² Nakosepela kozala lokola mobange Petelo, ntango bakotisaki ye na boloko. Elenge mobali moko azalaki na kati, azalaki motema likoló-likoló. Mpe alobaki: “Oh, likambo nini?”

Alobaki: “Oyebi ete bakoboma yo?”

Petelo alobaki: “Iyo.”

Alobaki: “Ee, kala mingi te, okokufa lelo.”

Alobaki: “Iyo.”

Alobaki: “Ee, bazali—bazali . . . ozali kobanga te?”

Alobaki: “Te.”

Alobaki: “Osengeli kozala moko na bato oyo babengaka Baklisto.”

Alobaki: “Iyo.”

Alobaki: “Likambo nini ekómelaki yo?”

²²³ Mpe ayebisaki ye, afandaki mpe abetelaki ye lisolo yango. Mpe ntango azalaki kobeta lisolo, na nsuka, alobaki: “Mpe nakokaki kozala nsómí na ntongo ya lelo. Nakokaki kokende kokota na moko na ba-denomination na bango, mpe kokóba kozala na bomoi, omoni. Nakokaki kozala nsómí. Kasi nazalaki kobima na ekuke ya engumba, mpe namonaki Moto moko koya, kokota. Nayebaki Nani Ye azalaki. Nalobaki: ‘Nkolo, Ozali

kokende wapi?” Alobaki: “Nazali kozonga mpo na kobákama lisusu na ekulusu.” Alobaki: “Nazongaki.”

²²⁴ Na mbala moko balobaki: “Nani nkombo na ye Simona Petelo?”

Alobaki: “Ngai oyo!”

Balobaki: “Tobelemi mpo na komema yo.”

Alobaki: “Nazalaki kozela bino.” Akendeki mpe abimaki.

²²⁵ Elenge mobali yango asimbaki ye na lipeka, mpe alobaki: “Zela naino, Simona; Ngai mpe nandimeli Nzambe yango! Mpe sikoyo nazali lisusu kobanga te; ngai nakobomama nsima na yo.” Ya solo. Aleluya!

Ezali naino . . . Ezali kotanga makila, iyo, ezali kotanga makila,
Nsango-malamu ya Molimo Mosanto oyo ezali kotanga makila,
Makila ya bayekoli oyo bakufaki mpo na Solo,
Nsango-malamu ya Molimo Mosanto oyo ezali kaka kotanga makila.

Moto ya liboso kokufa mpo na mwango ya Molimo Mosanto oyo,
Ezalaki Yoane Mobatizi, kasi akufaki lokola moto;
Na nsima, Nkolo Yesu ayaki, babákaki Ye na ekulusu,
Ateyaki ete Molimo ekobikisa bato na masumu.

Petelo ná Polo, mpe Yoane mosanto,
Bapesaki bomoi na bango mpo Nsango-malamu oyo ékoka kongenga;
Basangisaki makila na bango, lokola basakoli ya kala,
Mpo Liloba na Nzambe oyo ya solo éteyama na bosembo.

Milimo oyo ezali na nsé ya etumbelo ezali kobelela: “Kino ntango nini?”
Mpo Nkolo ápesa etumbu na baoyo basali mabe; (Bóyoka!)
Kasi bamosusu mingi bakozala, baoyo bakopesa makila ya bomoi na bango
Mpo na Nsango-malamu ya Molimo Mosanto oyo mpe ebale motane na yango.

Ezali kotanga makila, iyo, ezali kotanga makila,
Nsango-malamu ya Molimo Mosanto oyo ezali kotanga . . . makila,

Makila ya bayekoli oyo bakufaki mpo na Solo,
Nsango-malamu ya Molimo Mosanto oyo ezali
kotanga makila.

²²⁶ Likomi moko kaka liboso tóbima:

. . . mpe bango balobaki na Petelo pe . . . na bamosusu ete, Mibali, bandeko, tosengeli kosala nini mpo tóbikisama?

. . . Petelo alobaki na bango ete, Bóbongola mitema, mpe moko moko na bino ábatisama na nkombo ya Yesu Klisto mpo na bolimbisi ya lisumu na bino, mpe bino bokozua likabo ya Molimo Mosanto.

Mpo elaka ezali mpo na bino, mpe na bana na bino, mpe mpo na baoyo bazali mosika, baoyo nyonso Nkolo Nzambe na biso akobenga.

²²⁷ Nkolo ápambola bino sikoyo. Wana tozali kolongwa na nzela, mpo bókoka komona libatisi yango, ndenge to . . . ? . . .



KOTIAMA LOKUMU YA MWANA 3 LIN60-0522M
(Adoption 3)

MATEYA NA NTINA NA KOTIAMA LOKUMU YA MWANA

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na ntongo, mokolo mwa 22, na sanza ya Mitano, na mobu 1960, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org